

東  
華  
續  
錄

光緒一百十二

臣朱壽朋敬編

臣張毓英恭校

冬十月乙卯朔 上詣 太廟行禮○諭本年江蘇江甯揚州府屬入夏以來雨澤愆期田禾未能及時栽插甘泉一縣被災最重旬容候徵六合江浦等縣收成亦極歉薄小民困苦情形深堪憫惻自應妥為賑濟加恩賞給江南海運漕糧三萬石所有水腳運費等銀一併截留為甘泉等縣賑撫之用卽著劉坤一奎俊督同司道勘明被災處所嚴飭印委各員確查戶口核實散放總期實惠均霑毋任吏胥舞弊用副朝廷撫恤災黎至意○丙辰吏部等奏准刑部咨刑部具奏軍機處交出直隸總督李鴻章奏匪徒竊毀電報桿綫請明定治罪專條一摺光緒十八年閏六月二十三日奉 硃批刑部議奏欽此欽遵鈔錄原奏知照到部吏部查各省設立電桿電綫無論官電商電均經奏明立案地方各官有管轄地面之責自應隨時防護俾免滋生事端今據該督奏請議定地方官承緝失察處分係為力圖保護起見查地方官處分之輕重應以毀竊各犯罪名為斷現據刑部奏定竊毀各犯及失察地方官分別治罪專條臣部自應查照刑部奏案以罪名之輕重為處分之等差臣等公同酌議擬請嗣後如有匪徒聚眾拔毀桿

繞至數十里以外逞兇拒捕致成巨案核其所犯罪名係照土匪滋事定擬者將該管地方官議以革職公罪如能立時獲犯賠修完案減爲革職留任四年無過准其開復係行盜行竊致有折毀該犯擬徒者防護不力之地方官降二級留任公罪倘匪犯在逃未獲所有承緝處分並令照駐紮城外衙門官署被劫例按限開參初參將承緝官罰俸二參降一級留任三參照所降之級調用若經該督撫嚴參勒限緝拿卽照盜案嚴參例先行議以降一級留任限滿無獲議以降一級調用俱公罪如係一時誤毀罪祇擬杖失察之地保應行免議者該管之地方官免其處分兵部查各省防護電桿電綫文職承緝失察處分既經吏部查照刑部奏定竊毀各犯罪名分別議定地方文職處分其地方武職官弁均有防護之責如有疏虞自應與文職一律議處等公同酌議擬請嗣後如有匪徒聚衆拔毀桿綫至數十里以外逞兇拒捕致成巨案將該管地方武職議以革職公罪如能立時獲犯賠修完案改爲革職留任四年無過准其開復係行盜行竊致有折毀將該管地方武職議以降二級留任倘匪犯在逃未獲所有武員承緝處分照城外大小文武衙署倉庫被劫例按限開參初參將專汛官停升二參降一級留任三參降一級調用若經該督撫嚴參勒限緝拿先行議以降一級留任限滿無獲議以降一級調用俱公罪如係一時誤毀失察之地保應行免議者該管之地方武職亦一律免其處分如此分別議定處分專條庶地方官自

顧考成防捕可期得力如蒙 俞允卽通行各直省督撫一體遵照辦理得 旨如所議行○丁巳上  
御紫光閣看馬步射○戊午 上御御箭亭閱弓刀石○己未 上御太和殿傳臚○賜卞廣等一百四  
十八人武進士及第出身有差○庚申諭福潤奏濟陽灰礮桑家渡及胡家岸河口合龍請將道員張上  
達等分別開復處分一摺本年六月間山東濟陽縣灰礮桑家渡章邱縣胡家岸黃水盛漲漫溢成口數  
月以來經福潤督率在工員弁將三處口門竭力堵築於九月初七等日先後合龍辦理尙爲迅速濟東  
太武臨道張上達著開復降四級調用處分免其查級禮部知道欽此○又恩得勝知縣王建嘏趙惠  
錫祐均著開復革職處分知府郝廷珍直隸州知州李恩祿均著開復頂戴其餘出力員弁著俟白溝壩  
工竣一併擇尤請獎毋許冒濫○德馨奏臣前因萍鄉縣會匪勾結竄擾調營防禦並官軍在南坑地方  
接仗獲勝及現在趕緊搜剿情形先經具摺奏報並聲明匪首僞楚氏一王鄧海山已據萍鄉縣知縣顧  
家相稟會營圍擊散眾匪在柳源地方圍拿擒獲又據袁州府知府賈孝珍督同宜春縣知縣楊焜稟  
拿獲大頭目李保山一名經臣以情罪重大批飭由府解省審辦在案嗣據管帶剛字營申道發在大安  
里搜獲僞平南王羅鳳岡一名又經臣批飭袁州府與道首鄧海山等一併解省審辦現據袁州府派委  
員弁飭差兵役將該匪等解審前來臣當飭臬司發委南昌府審辦據南昌府曹秉澤將明開錄供單呈

送前來臣卽督同臬司親提研鞫據鄧海山供先在各營當勇辭退後教練拳棒度日嗣遇湖南人屈希元周子林結義入會倡立武嶽山洪福堂散賣票布傳授口號句結黨羽圖爲不軌素知武功山大安里地勢偏僻有險可憑邀集各路頭目各帶在會之人約有八九千人之譜於七月二十八日在大安里豎旗起事羣匪尊爲正龍頭及楚氏一王僞號聽其號令指揮原欲攻與縣城乘勝西取醴陵以爲根本不料祭旗之時大風陡起將旗吹倒以致衆心解體散去甚多只得在大安里暫行屯紮並於山口巖等處設立關卡派鄧雲輝把守待軍械各備再行大舉詎羅翊庭羅安子等先帶數百人搶掠蘆溪團練軍火鄧雲輝又從山口巖衝出與團練接仗鄧長子又探得省城大兵疾趨前來知事已洩漏不得不曾合各頭目先竄南坑與取萍鄉當被官軍連擊敗逃至柳源地方黨與傷亡殆盡力竭被擒又據羅鳳岡供聽邀入會爲匪總辦糧臺接濟糧餉封爲僞平南王又據李保山供入會多年升爲五牌大頭目可管五百人後又封爲僞保兵元帥各等供不諱臣查該逆首鄧海山膽敢僞立楚氏一王僞號嘯聚八九千人據險負隅倡亂謀逆屢與官兵接仗圍據城池是其陰謀詭計蓄志甚大實非尋常匪類可比幸天心厭亂祭旗風倒解散甚多尤賴我皇上威福宏遠國防則紳民向義勇營則將士知方巨懸就擒匪衆迅掃地方不至蹂躪兼旬之內事已敕平設使撲滅稽遲該匪稍得藉手如火燎原何堪設想其僞平南王羅

鳳岡爲匪總辦楊臺僞保兵元帥李保山統帶五百人之多均屬同惡相濟世所難容未便稍稽顯戮臣  
於督同司道審明後即恭請 王命委按察司福裕會同 臣標中軍參將鮑莊將鄧海山綁赴市曹凌遲  
處死羅鳳岡李保山各斬決均傳首犯事地方懸竿示衆以彰天討而快人心此外各營縣團練先後拿  
獲之匪犯僞右大王羅石仔僞平南王洪六仔僞三大王黃仁芽僞總管蕭登山僞千總李保元僞百總  
劉連昌僞先鋒羅狗仔劉岐山及頭目李芸相陳方仔羅安仔曠冬狗劉尙高劉連生劉尙廷陳萬具張  
長盛陳福劉桂和陽包包劉狼古李辣縣姚懷懷羅官陶李慶滋李寶堂羅鳳山姜威等或僞立僞號同  
謀起事或抗拒官兵甘心爲匪據該府縣等審訊明確均屬罪大惡極法無可貸亦經 臣核明分別批飭  
就地正法梟首示衆以昭炯戒一面仍飭各營入山上緊搜捕逃竄餘匪務期淨盡以除後患所有拿獲  
首要各犯出力之員弁團紳營勇容 臣詳細察明仍俟一律肅清後擇尤兼同請獎得 旨知道了仍著  
督飭各營搜捕餘匪務淨根株出力員弁事竣准其擇尤請獎○甲子 慈禧端佑康頤昭豫莊誠壽恭  
欽獻皇太后萬壽聖節 上詣 慈禧宮行禮○己巳陳懋侯奏 臣伏讀嘉慶十六年四月二十六日內  
閣奉 上諭問刑衙門遇有應加刑鞠之處本有一定制度若私造非刑任意殘酷必至損折肢體傷害  
性命殊失國家欽恤之意等因欽此 聖謨煌煌萬世所宜遵守乃近聞邸鈔兩江督 臣劉坤一奏審明

已革廬江縣知縣楊需霖被控濫刑斃命一案所稱楊需霖每逢杖責必先在地限定長短闊狹分寸定須照樣打破方止張咸義兩骸已經打兩洞楊需霖又將其上挺棍用竹帶鞭背兩隔兩日又將張咸義重責四十並上棍架跪鐵鍊連時數刻始行鬆放又令黃桂黃仲在張咸義兩骸原傷上用竹板再打五百黃仲等不忍下手因畏楊需霖嚴厲不敢不從以致張咸義受傷越日斃命又挾忿將許榮用站籠絕食站死此外如張新業張李氏謝老窩仔陳振瑚張墨林陳護羅進魁羅進坤孫小等或上棍架或踹扛子或上挺棍或用竹帶鞭背或兩手用皮條套在腕上責打手心致左手成廢或裝入站籠用硃筆標明封條斷絕水米站死示眾種種暴厲酷虐殊出情理之外雖經訊明擬結發往新疆當差尙覺法輕情重不足蔽辜一縣如此他縣可知一省如此他省可知以臣所聞近來各省問刑衙門盡置架天平架失魂牌猴抱桃敲腳脛骨冷水澆背荆條擊背等刑凡干例禁者仍舊施用小民何辜罹此荼毒卽謂承審命案搶竊及一切要案如實有罪之人證據明確而犯供狡展或用踹鍊鐵壓膝等刑原有免其監獄之條若係案內干連人犯或被扳無罪之人以及審理尋常事件犯情無難得實尙不得妄用踹鍊壓膝等刑而況其酷虐有甚於此者乎應請 飭下各省問刑衙門申明舊例如有前項非刑速行除毀違者照違制律嚴參治罪仍令各督撫認真詳查隨時懲辦以爲非刑虐民者戒 上諭御史陳懋侯奏各省

州縣濫用非刑請飭嚴禁一摺內外問刑衙門設立刑具本有一定制度若如所奏各省州縣濫用種種非刑實屬大千例禁著各該督撫申明舊例嚴行禁止如有前項情事卽著隨時參辦毋許姑容用副朝廷明慎用刑至意○辛未諭給事中王會英奏奉天莊糧衙門委署主事全祿催收餘租均係右莊頭拖欠應完之款當令裕祿確查茲據查明覆奏此案莊糧衙門委署主事全祿催收餘租均係右莊頭拖欠應完之款尙非違例重徵承辦之員尙無侵吞虧折實據惟舉動粗浮辦事糊塗與情實多不合著卽行革職翼領候補承順於牧驢官馬尙無抵換盜賣情弊惟不能盡心牧養以致倒斃數目過多實屬咎無可辭筆帖式清太裕宗僅長惠麟分任莊糧承催尙無結欠營餉情弊惟平日因循積習於餘租不能依限徵解致連年拖欠不清亦有不合均著交部分別議處以示懲儆○癸酉李鴻章奏長蘆所屬直隸兩省引岸前於道光十四年停引十萬道嗣後迭經奏准推展五年光緒九年十二年十五年部議僅展三年應於十八年底限滿經臣飭司豫籌復額旋據運使季邦楨詳稱蘆商本鮮殷富直隸各岸又多瘠區光緒十六年大水爲災元氣至今未復本年又遭災歉戶口凋殘情形更非昔比以致銷數愈滯且額設引目過多除提繳減停外尙有現引六十大萬餘道從前併引加斤鹽包節次增重道光二十八年清查案內每引又加鹽一百五十斤核計所加斤數實占額引四分之一其應交課款亦自一兩二錢遞增至二兩於是



商累日甚雖迭經督同運司竭力整頓並由派撥練軍分駐協捕但民間日食有定餘鹽無處融銷是以光緒十六年僅出庫引六十萬六千餘道十七年僅出庫引五十六萬八千餘道本年秋關將竣僅出庫引五十六萬八千餘道不特未敷現引六十六萬餘道之數且十七年出引較十六年尤爲減少現查庫存歷年積引至五十七萬一千餘道其已運岸之鹽亦復存積疊疊引雖出庫鹽實未銷盡引既難疏通新引何從增益況各商每屆尙須包賠庫存積引之課若遽行復額再令包賠十萬道課帑商力難支勢必參懸相繼無裨實事有礙大局據綱商稟懇推展該司詳加體察請照原案再行推展五年俟限滿察番核辦等情具詳請奏前來臣查蘆綱現引六十六萬餘道迭經設法疏銷每年仍積滯數萬道未能如數領運其勢實難再加然核計鹽包斤數及交納課帑銀數較原額有增無減於公家尙無所損頻年水災甚重銷數益滯商力極艱該司季邦楨請速議復額無裨實事有礙大局確係實情相應仰懇 天恩俯准將原停引十萬道自光緒十九年起仍照原案推展五年以恤商艱而保現課得 旨如所請行○甲戌刑部右侍郎周德潤卒賜卹如例○丙子以李端棻爲刑部右侍郎○劉秉璋奏上年大足縣匪徒余蠻子余翠坪等打毀龍水鎮等處教堂並教民房屋率眾踴聚臣派撥營勇擊散後迭經前督川東道張華奎與該主教逐層議明將案辦結經臣詳細查明在案所有案內首匪余蠻子等通飭查拿未盡

弋獲本年七月該署令桂天培探悉余翠坪等誘勒山中炭丁多人意欲搶劫教民黃谷家經臣酌撥長勝副中營哨官儘先把總商執中前往拿辦據桂天培稟報有銅梁匪徒劉義和勾串余翠坪糾匪二百餘人在銅梁搶劫教民唐明興家旋復至大足樂溪場搶劫教民桂應宗家桂天培先已自募山丁督同員弁紳團共百餘人跟蹤拿捕該匪等膽敢聚眾出場架列大礮擬鎗罵陣抗拒情同叛逆桂天培督勇奮力鏖戰一時之久匪勢不支外委王應賢等砍取首級三顆餘匪帶傷狂奔我軍追擊生擒王樹蘭巫長生李銅匠三名臣即批飭將王樹蘭等三犯就地正法又添調駐渝儘先遊擊方玉興前往會剿旋於八月初一日又據桂天培稟報先後調撥之營勇管帶商把總方遊擊已抵縣城止會商拿辦聞二十日該匪余翠坪與余蠻子復糾合二三百人在於龍水鎮盤踞桂天培整頓隊伍與營弁商把總等分隊合剿該匪聞知官軍追至改竄跑馬場旋又退紮十箭場二十一日我軍追至該匪已將東西場口堆砌木石等物以作壁桂天培當將勇丁分爲前哨左哨協同商把總等帶勇由東場口進桂天培自帶中哨右哨並幫辦營務之劉希亮大竹汛弁秦鴻賓由西場口進同時會攻該匪開放鎗礮密如雨下我軍更番迭進相持四時之久彼此均有傷亡桂天培右膀受礮子傷猶復裹創督戰各勇弁捨命直前右哨弁陳鳴勳將手執令旗之僞軍師周西伯砍斃兩頭弁勇鼓噪直入砍殺匪始大敗當將余翠坪擒獲並陣

斬十四人生擒十五人商把總擒獲三人陣斬四人餘匪受傷逃竄奪獲鎗鎗大礮器械無算李尙儒亦於中途邀截斬取首級三顆當將生擒之十五人在於陣前正法是役也計共斬首四十名我軍員弁勇丁受傷者六十三人陣亡五人提訊余翠坪供認打教搶劫謀逆不諱余蠻子已被礮傷逃逸該令右勝礮子向未取出等情具稟前來茲經臣電飭將余翠坪斬決梟示並通飭嚴緝余蠻子等務獲究辦伏思大足教案疊興皆由民教不和匪徒藉打教爲名哄誘紳團與之聯爲一氣故從前辦理殊多牽礙自前署川東道張華奎剴切出示曉諭紳團不使庇匪現任黎庶昌亦力主此議現署大足縣准補資陽縣桂天培到任以來聯絡紳團官兵一氣故此次匪首糾衆打教搶劫紳團無一助逆者平日駕馭極爲得法此次悍匪列陣死鬪如該署令顧惜身命則勢將熾原川東匪徒必羣起而與教堂爲敵其禍實有不可收拾者該署令桂天培身受鎗傷猶能裹創督隊卒獲大勝自未便沒其微勞茲謹擇其出力尤著者請獎並將陣亡之弁勇請卹彙列清單恭呈 御覽合無仰懇 天恩准照所請獎勵用昭激勸而安民教得 旨著照所請該部知道單併發○己卯 上御承光殿駐京英國使臣歐格訥覲見呈遞國書並英主自著書集○庚辰賞給京師八旗練步各營官兵半月錢糧○賞給聞散宗室覺羅人等一月錢糧○壬午李鴻章奏承准軍機大臣字寄光緒十八年八月二十四日奉 上諭給事中洪良品奏永定河水

性湍急每易潰決其北岸頭工上汛關繫尤重請接連石景山二十四號自北上汛頭號起至十號止添砌石堤十里以資捍衛等語著李鴻章遵派熟悉河工之員前往該處詳細履勘妥籌具奏等因欽此臣查十六年北上二號漫口大工經派臬司周馥前往督辦該司熟悉機宜卽飭馳赴該處會同現辦工程之存記道桂本誠永定河道萬培因詳細勘度據該司道等勘得北上一汛堤長十五里中間河面寬六七里首尾兩段僅寬三里勢成兜灣若建石堤須做長十三里過此兜灣抵十三號之利堡土岡而止乃得形勢永定溜流湍悍每遇橫河頂衝搜刷帶根深至二丈數尺石堤必須深築根脚使其不能搜翻連日探驗河底其一二號內挖下一二丈偶見石子三號以下純係細沙石堤難於生根惟有就沙開槽釘椿滿築灰土以爲基址挖深則水源旺出工作倍難該給事中原奏謂河底全係石子自係未經勘驗之言查勘蘆溝橋上下連年石堤其大塊條石需費最鉅其次則用成片石塊不拘方圓尺寸疊砌成堤其整齊堅厚者皆百年以外之工至今未壞今擬仿此做法采取片石用灰疊砌需費較省該處距采灰石各山遠者四十餘里近亦二十餘里官采毋庸給價惟給開鑿人工及搬運車脚駝力細核道路遠近載運斤兩所費已屬不貲現擬石堤做法自頂至底共高三丈底寬一丈六尺頂寬四尺堤底築灰簳格以資挈托堤頂加築灰土以防雨水滲入連頂底灰土並計高三丈四尺二寸堤後幫築素土共成堤頂寬

四丈底寬九丈一尺所擬做法丈尺均係從省核算不能再減該司道等親往采石各山履勘並面詢土  
簪匠夫調查從前工冊就現在修補段落察驗攬節估計每片石堤做成一丈應需銀三百七十兩八錢  
三分八釐三毫計自北上頭號至十三號剝堡地方止計程十三里共二千三百四十丈需銀八十六萬  
七千七百六十一兩零堤後每里應做了字石格六道需銀一萬七千五百餘兩共銀八十八萬五千二  
百六十餘兩此外尚有官役薪飯匠夫棉絮席棚土房紙張油燭雜用一切約銀四萬兩原奏謂十里石  
堤需費不過十數萬金亦係未經分析考核之實此項石堤工程每年凌伏秋三汛不便創構十月至正  
月凍結期內不便砌灰歲計做工祇有五六箇月開工以後諸事順手必須四年始可辦成由該司道等  
繪具圖說詳報前來臣查北岸頭工乾隆嘉慶年間因工段險要兩次奏改分爲上中下三汛而上汛尤  
形喫重歷屆歲費料價四五千金大汛搶險尙難預計堤岸純是白沙十里以內難寬膠土汛漲搶護幾  
於人力難施實爲各汛最險之工一遇漫溢輒衝刷南苑牆垣右安門彰儀門一帶皆爲水阻卽如十  
六年二號漫口被災之廣堵築之費是其明證該給事中謂籌治永定河莫亟於北岸上汛自是有鑒於  
此今擬添建石堤藉資捍衛洵爲防患未然一勞永逸之計近年河工人員亦多有持此議者總慮工程  
浩大鉅款難籌竊維此工屏廠京師且關下游民生利害仰荷聖明垂問何敢以工艱費鉅諉爲可

緩之圖直隸本屬缺額之區加以連年工賑頗仍實無餘力如果舉辦必須請撥部款惟部庫同一支絀九十餘萬之鉅帑即使分年指撥恐亦籌措為難臣再四思維與該司道往復籌度惟有分段擇要舉辦之法測量該處地勢自一號至八號河底高於平地一丈數尺至三四尺漫溢則必奪溜水勢正對苑門為患最重九號至十三號河底低於平地一二三四尺即使溢出尚易搶護且距京略遠為患較輕茲擬先將最要之一號至八號接造石堤工長八里共一千四百四十丈連每里添修石格共需銀五十四萬四千八百七兩零計三年可以造成由部分年撥款每年約需銀十九萬至薪費雜用等項仍需銀三萬兩即由直隸添撥尚可竭力勻籌其九號至十三號工程應俟以上八號工竣後察看情形再行酌辦似此擇要分段辦理則請款較少程功亦速請飭其北岸上汛形勢圖說恭呈 御覽伏懇 敕下部臣詳籌議覆一俟撥定款項即可從速興工現估工程物料係按時價實用估計力從撙節未便以例價相繩將來定議開辦再由臣選派熟諳工程大員詳細覆核督率辦理得 旨該部議奏圖併發○癸未諭軍機大臣等戶部奏籌備銅幣一摺據稱癸巳年籌備銅幣共指撥銀二百萬兩請飭依限報解等語此項銅銀關係緊要著該撫按照指撥銀數於來年四月底前解到一半十月內全數解清毋稍遲逾○甲申唐炯奏臣承准軍機大臣字寄光緒十八年七月二十八日奉 上諭本日戶部奏核籌南銅本運費解

唐炯所奏每百斤暫加銀一兩已依議行矣另片奏請飭整頓銅運等語唐炯係葉琅錄用之員宜如何力圖報稱乃自到雲南以來前後奏報銅廠漸有成效迄今已閱三四年辦運之數每年不過兩批毫無起色實屬有負委任現值寬為加價之時務當激發天良力籌解法逐歲加批倘再空言搪塞任意鋪張著戶部據實嚴參從重治罪其前請加借工本銀兩分年繳還暨運西礦務暫免課耗現已奏限屆滿均著唐炯迅速清結毋稍遲延至該省近年所解銅斤夾雜鐵砂低銅多至八九萬斤或十餘萬斤實屬不成事體著唐炯嚴飭該公司等嗣後不得再有低潮摠和情事並隨時稽查如有此等弊混卽著將該廠員等嚴參示懲原片著鈔給唐炯閱看將此諭知戶部並諭令唐炯知之欽此欽遵寄信到臣跪誦之下惶悚莫名伏查辦廠之法首在多獲礦砂尤要在礦質厚重始能多出銅斤此一定不易之理然礦砂之多可以人力強取至於礦質或厚或薄則繫乎地氣有非人力所能強致公司所開各廠其礦質以巧家廠為最然每百斤礦砂煎煉成銅止七八斤至多不過十斤威寧廠卽前奏所稱西貢山礦每百斤煎煉成銅不過三斤其他宜威平彝等廠礦質亦止三二斤不等以本年一百五十萬斤銅計算需礦已三千一百數萬斤是礦不為不多廠不為不好而得銅止有此數則以礦質淡薄之故而必翻鍛七八次閱六七十日乃能成銅人工炭火耗費不資礦質之淡薄如彼時日之耽延人工之耗費又如此此公司之

所以賠累拮据而京運之不能遲期復額職是之由凡此皆係實在情形非敢空言欺罔今幸仰蒙 恩  
賞加價臣已嚴飭公司多方接濟民間油米俾窮民踴躍隨地開採以期廣種博收裨多益寡然如此辦  
法亦非尅日所能奏效臣惟有勉竭愚誠隨時指示督催不敢疏懈至加借工本十萬兩已據呈繳四萬  
其餘六萬臣以限期屆滿迭次嚴迫據該公司稟稱委因夏間雨水為災礮硐水淹爐座坍塌又須重新  
修理始能趕辦銅斤需費甚多實屬苦累應懇之款懇求寬至明年臣恐有誤京運不敢不暫行批准稍  
示體恤斷不敢任其久懸尙求 天恩俯允以紓商力其銅色間有低潮實因各廠銅質高下稀稠不能  
一律臣已嚴飭該公司加工煎煉遵照部章成色務在八五以上並飭廠員認真挑選倘再有低潮一經  
部局挑出照例賠償仍予懲辦至迤西廠務係該處紳民自行開辦祇以資本甚薄或作或輟尙無成效  
俟其見功再行起限專案奏報得 旨如所請行○是月英吉利國新簡駐華使臣歐格納抵任

十一月丁亥大祀 天於圓丘 上親詣行禮○諭李鴻章奏查明開州等州縣災歉情形請分別蠲緩  
糧賦一摺直隸開州東明長垣三州縣濱臨黃河村莊本年秋禾被水災歉若將應徵糧賦照常徵收民  
力實有未逮加恩著照所請所有開州渠村集等八十一村成災十分莊寨等五村歉收四分東明縣耿  
寨等五十八村成災七分武邱集等三十四村成災六分高堽等二十三村成災五分雙井等十一村歉



收四分長垣縣任雙祿等一百二十六村成災八分于堂等六十四村成災五分西毛六店等十村歉收四分惠油房等二百二十九村歉收三分著將成災六分村莊本年錢糧蠲免十分之一成災七分村莊本年錢糧蠲免十分之二成災八分村莊本年錢糧蠲免十分之四成災五六七分村莊蠲剩錢糧緩至光緒十九年秋後起分作二年帶徵成災八分村莊蠲剩錢糧緩至光緒十九年秋後起分作三年帶徵如有未被災以前花戶長完銀兩准抵下年正賦又各災村應完節年錢糧並歉收四分村莊應完本節年錢糧歉收三分村莊應完節年錢糧均著緩至光緒十九年秋後散徵其有出借倉穀等項著一體緩徵並分別減免差徭以紓民力餘著照所議辦理○戊子諭軍機大臣等有人奏刑部侍郎薛允升之子內閣侍讀薛浚交通宵小有杜權著綽號刑部大了薛浚引為黨羽在外招搖等語著派翁同龢懷塔布按照所參確切查明據實覆奏○諭御史文郁奏吏部銓補各項捐班人員宜嚴防取巧以免苑枯等語著吏部議奏○諭御史文郁奏各衙門會核秋審刷審招冊為時太促請飭刑部先期分送以憑詳核一摺著刑部議奏○己丑李鴻章奏光緒十五年臣等會奏請設甘肅電綫摺內聲明新疆自收回伊犁之後俄人往來絡繹南路喀什噶爾與英屬北印度接壤中隔布魯特坎巨提各部部落交涉日繁應節節預籌設綫通報惟道里綿遠經費過鉅祇能分段接辦先將西安電綫展至蘭州本年三月復因新開遠處

邊陲遇有緊要文報由肅州轉遞動需時日聲息遲滯經總理各國事務衙門籌撥款項由臣飭令電報總局購料鳩工將肅州電綫展至新疆省城八月間定購外洋料物到滬卽派熟悉委員勘路並催分運木料已值冰雪凝凍須開春三月後冰融趕緊加工約明歲五六月告竣疊准總理衙門函商以俄使喀希尼屢次晤商帕米爾勘界語極桀驁將來作何歸宿尙無把握天山南路情形重於北路境外零星回部此後事變尙多烏魯木齊去京八千數百里喀什噶爾又去烏魯木齊四千里文報週迴卽電前事件亦往往逾月若值邊情緊急之時消息不靈必致事機多誤除關外電綫應飭如期趕辦外其烏魯木齊西抵喀什噶爾電綫不通仍形隔閡應再籌款乘此鳩匠興工之候爲事半功倍之謀一氣呵成實於邊防大局裨益等因臣查係籌邊至要之圖不可再緩俄國都城東至伊犁喀城等處如此驚遠皆有電報瞬息可通我若仍賴驛遞因應之間必致遲速懸殊卽經督同總辦電報事宜津海關道盛宣懷按圖查核關外電綫原擬由哈密經吐魯番以達新省現議展綫可由吐魯番至庫車阿克蘇以達喀什噶爾城約計三千八百餘里道途遼遠轉運愈難戈壁崎嶇工程艱鉅所有運費工費必更加增且外洋料價均以金鎊核作銀兩比較前辦黑龍江雲貴電綫之時加至十分之二三爾木料尙可沿途砍伐各營助以兵力略可節省仍照向章約估需銀二十八萬餘兩現庫款支絀新疆瘠苦斷難籌此鉅資臣與總理衙

門籌商擬於江海關所存出使經費暨海軍衙門生息應退出使經費項下各提銀十四萬兩以資應用如蒙 俞允應請 旨敕下總理各國事務衙門海軍衙門迅速照撥由臣轉發盛宣懷購辦電料派員查勘路線於新疆電綫設成後卽行一氣接辦並由新疆撫臣陶模分飭沿途各州縣縣預爲採辦木料按里分屯以備取用各項經費核實動支如有不敷由臣等另行籌給得 旨如所議行○庚寅諭前派

翁同龢查辦內閣侍讀薛淩被參一案著改派徐桐會同懷塔布按照所參確切查明據實覆奏○癸巳

上詣 慈禧端佑康頤昭豫莊誠壽恭欽獻皇太后前請安○甲午諭前據張聯桂奏廣西在籍紳士

雷祖迪等呈稱已故廣西巡撫蘇鳳文功績卓著懇請宣付國史館立傳俟例限屆期再行題請建祠當經降旨允准本日都察院代奏廣西京官鍾德祥等聯名呈稱蘇鳳文官場聲名平常輿論不治吏部主事雷祖迪以在京供職並未在籍具呈等詞赴該衙門聲明覆據翰林院侍讀唐景崇等奏蘇鳳文顯貴擢功羣情怨恨懇請收回成命等語國史館立傳必須事實詳確方足以昭彰卹之公蘇鳳文官場時不特輿情不治且爲衆怨所歸豈可濫邀曠典所有請將蘇鳳文事續宣付史館之處著卽撤銷例限屆期題請建祠亦不准行張聯桂於蘇鳳文聲名政績並未詳查確實遽行入告且雷祖迪既未在籍具呈何以該撫率不加查尤屬不合張聯桂著交部議處○乙未 上詣 大高殿祈雪○丙申恭駿奏據塘工

局司道會詳稱杭州府屬東中西三防石塘之外須建臨水柴壩帶土盤頭裹頭埕坦水石各堵工共長二萬三千餘丈又於西中防交界處所建築大龍頭一道工長四百餘丈前經先後籌撥每歲修銀二十三萬餘兩並議定章程詳經前撫臣奏明飭由東中西三防廳備擇要修築歷經遵辦在案光緒七年間經升任撫臣譚鍾麟以經費支絀擬減為每年修費銀十七萬四千兩乃是年適遇異常風潮仍用至二十三萬餘兩之數後因潮勢平和工程安穩並撫臣衛榮光議自光緒十四年起大連小圩海鹽平湖各工歲用銀不得過十四萬二千兩聲明自今以往倘能潮行順軌歲慶安瀾即以現定銀數作為常年歲額設遇潮旺工多萬一不敷或三防未建盤頭柴埕等工有須因時制宜照舊建復之處再當隨時察看情形詳請奏明添撥等因光緒十五年猝遇風潮損工甚多修費不敷經該司道會詳詳經奏明添撥歲修銀三萬八千兩分別辦理在案惟當時以淤損工段甚長僅擇尤險者計銀興修其稍次者仍然暫行從緩十五年以後又復照減定之數辦理時形竭蹶年復一年實已搖朽柴壩一經旺潮衝擊更易傾頽且近年南岸陰沙逐漸漲寬潮勢北趨未能如昔年之安常履順加以本年七月十九至二十一等日陡起颶風潮乘風威貼塘鼓撲致三防淤損限外柴埕各工情形均屬岌岌可危茲就其險而尤險者計之東防四百餘丈西防四百餘丈南龍頭四五十丈中防三百餘丈據該管廳備開摺呈由杭嘉湖道王

祖光臨塘勘明屬實現查本年歲額已無餘款而損壞各工又如此之多若遷延延緩竊恐來春山潮並旺措手不及設或一旦潰決其患何可勝言此項工程必須乘冬令水涸之際分投次第修築以禦春汛而免貽誤再四籌商勢不能不酌量添撥茲經會議並據該廳備等會稟以升任撫臣譚鍾麟擬定每年十七萬四千兩之數尙爲執中請自本年起准其添撥銀三萬二千兩作爲三防歲修經費俾要工得以及時興辦卽以後亦可免顧此失彼之虞至添撥之款仍以塘工加抽絲捐支給查加抽絲捐塘工一項如絲銷暢旺每年約收洋十一二萬元當可敷用尙無須另行籌撥等情詳請具奏前來奴才覆加查核委係實情伏乞 飭部查照施行得 旨如所請行○己亥 上詣 慈福端佑康頤昭豫莊誠壽恭欽獻皇太后前請安○庚子以綽哈布爲福州副都統○辛丑以敬信兼署刑部左侍郎○壬寅刑部奏內閣鈔出湖廣總督張之洞奏嚴懲會匪分別輕重酌議辦理章程具奏一摺光緒十八年九月二十九日奉 硃批刑部議奏欽此○臣等查原奏內稱承准軍機大臣字寄光緒十七年六月初六日奉 上諭各省哥老會匪最爲地方之害迭經降旨查拿並經各該督撫先後覆奏明懲辦惟此案匪徒行蹤詭秘往往與游勇地痞暗相勾結動輒糾集黨羽乘機煽亂甚致造謠惑衆潛謀不軌近來江蘇安徽湖北江西等省屢有焚毀教堂之事其拒捕逞兇搶劫衙署等案更層見迭出半由會匪從中主謀游手之徒相

率附和以致愈聚愈多助成巨案犯事以後四散逃逸真犯十不獲一若不先事籌辦絕其根株則涓涓  
不患將成江河後患何堪設想著各直省將軍督撫嚴飭地方文武隨時留心實力查緝如有訪獲會匪  
首犯一面嚴行懲辦一面准將出力員弁照異常勞績隨案奏請優獎但須查有確實證據不得因希圖  
保獎妄拿無辜致滋擾累凡地方良民有誤買匪徒保家偽崇呈繳地方官者免其治罪其有向充會匪  
自行投首密報匪首姓名因而拿獲者亦一律宥其既往准予自新該將軍督撫務即出示曉諭俾眾咸  
知總期嚴懲首惡解散脅從以除奸宄而安良善慎毋養癰成患貽害地方是為至要將此通諭知之欽  
此當即恭錄咨行欽遵在案等因上年春夏以來因湖南及沿江會匪屢次蠢動滋事迭經嚴飭地方  
文武水陸防營懸立重賞購緝密緝奉 旨後通飭各屬剴切示諭嚴密查拿先後拿獲長江會匪首要  
高德華葉坤山等及襄河會匪李朝奎等當將拿獲訊明懲辦各情形恭摺具奏並札飭前辦按察使詳  
繹例意參考近年成案妥議懲辦章程通飭州縣遵辦去後茲據該署司詳稱鄂省為南北衝要游匪素  
多往來無定最易潛匿會匪幾至無地無之始則長江上下游一帶近年則襄河上下游一帶隨處皆有  
根株盤結消息靈通該匪等開立山堂散放票布分授偽職偽號往往與教匪游勇地痞暗相勾結乘機  
煽亂各處所獲會匪各案起到票布印單板片及所訊名目口號詞意悖逆顯係謀為不軌上年沿江一

帶會匪蓄謀滋事動成巨案若非先事捕其渠魁散其夥黨誠如 聖諭所云養癰成患必致有關大局極應明定章程從嚴懲辦以遏亂萌擬請嗣後貴成州縣隨時訪查如有會匪潛跡境內立即會督營汛嚴密拿獲悉心研訊如係會匪爲首開堂放票者及領受票布輾轉糾夥散放多人或在會中名目較大充當元帥軍師坐堂陪堂刑堂禮堂等名目者與入會之後雖未放票輾轉糾人而有夥同搶劫情事者及勾結教匪煽惑擾害者一經審實卽開錄詳細供招照章稟請覆訊就地正法此外如有雖經入會並非頭目情罪稍輕之犯或酌定年限監禁或在籍鎖帶鐵桿石墩數年俟限滿後察看是否安靜守法能否改過自新分別辦理其無知鄉民被誘被脅誤受匪徒票布希冀保全身家並非甘心從逆之人如能悔罪自首呈繳票布者一概從寬免其究治其有向充會匪自行投首密報匪首姓名因而拿獲者亦一律宥其既往准予自新若投首後又能作綫引拿首要各犯到案究辦除免罪之外仍由該地方官酌量給賞總期嚴懲首要解散脅從除奸宄而安良善地方文武員弁能拿獲實匪查明首要審實懲辦卽將尤爲出力員弁核其情節卽照異常勞績隨案請給優獎如有希圖保獎妄拿無辜或姑息徇縱不拿不辦以及曲爲開脫一經查出卽行嚴參如此明定章程各州縣有所遵行自必隨時留心實力查緝不敢輕縱玩忽該匪黨亦當知所儆懼地方可則安謐等情詳經 臣等核查近年會匪日熾沿江沿海爲尤甚

滋蔓愈廣蓄謀愈險若不及早懲遏將來恐終爲大局之憂查光緒八年刑部奏定通行章程各省會匪本有就地正法之條無如州縣狃於積習毫無遠慮往往牽引異姓結拜弟兄徇例曲爲開脫以致伏莽日滋寢成巨案湖北所議章程自應奏明通行各屬俾有遵守該司所擬首悔免罪及分別輕重辦法於懲奸弭亂之中仍不失宥過持平之意消除巨患卽所以保全善良文武員弁如能拿獲著名首要自應酌核案情欽遵 諭旨隨案奏請優獎如妄拿無辜擾亂閭閻以及縱匪貽害亦卽嚴行參處以仰副

朝廷除莠安良綏靜地方之至意等因具奏前來臣等查直省不法匪徒糾結夥黨私立會名搶劫財物甚或散放票布分投僞職僞號乘機煽亂最爲地方嚙愛定例閩粵等省匪徒潛謀糾結復興天地會名目搶劫拒捕者首犯與曾經糾人及情願入夥希圖搶劫之犯俱擬斬立決又光緒八年臣部議定章程會匪一項與土匪馬賊游勇案情重大形同叛逆之犯均准就地正法誠以此等莠民聚衆滋事若不從嚴懲治必致滋蔓難圖況近年以來各省會匪竊匪哥老會匪到處蠢動實繁有徒如果暗相勾結尤恐養成巨患自應嚴密查辦以遏亂萌茲據該督撫以上年春夏以來湖南及沿江會匪屢次蠢動迭經嚴飭地方文武水陸防營懸立重賞購緝密緝先後拿獲長江會匪高德華等及襄河會匪李朝奎等當將訊明懲辦各情形恭摺具奏並札飭臬司詳釋例意參考近年成案妥擬懲辦章程通飭州縣遵辦去後



茲據該臬司詳稱鄂省爲南北衝要游匪素多往來無定最易潛匿會匪幾致無地無之始則長江上下游一帶近年則襄河上下游一帶隨處皆有根株盤結消息靈通該匪等開立山堂散放票布分授信職僞號往往與教匪游勇地痞暗相勾結乘機煽亂各處所獲會匪各案起到票布印章板片及所賦名目口號詞意悖逆顯然謀爲不軌上年沿江一帶會匪藉謀滋事動成巨案若非先事捕其渠魁散其夥黨必致有關大局擬請嗣後如有會匪爲首開堂放票及領受票布輾轉糾夥散放多人或雖未放票輾轉糾人而有夥同搶劫情事及勾結教匪煽惑擾害者一經審實照軍票請覈訊就地正法此外雖經入會情罪稍輕之犯分別年限監禁鎖繫桿墩其鄉民被誘被脅悔罪自首並會匪自行投首密報首要姓名因而拿獲及投首後作綫引拿首要到案者均一律從寬免其究治等情詳經該督等將所議章程通行各屬俾有遵守等因具奏係爲除莠安良綏靖地方起見臣等公同酌議應如該督等所奏嗣後湖北省拿獲會匪如訊係爲首開堂放票者及領受票布輾轉糾夥散放多人或在會中名目較大充當元帥軍師坐堂陪堂刑堂禮堂等名目與入會之後雖未放票輾轉糾人而有夥同搶劫情事及勾通教匪煽惑擾害者一經審實卽開錄詳細供招照軍票請覈訊就地正法傳首犯事地方懸桿示衆仍逐案具奏此外如有雖經入會並非頭目情罪稍輕之犯以酌定年限監禁或在籍鎖帶鐵桿石墩數年俟限滿後察

看是否安靜守法能否改過自新分別辦理其無知鄉民被誘被脅誤受匪徒累布希冀保全身家並非甘心從逆之人如能悔罪自首呈繳票布者一概從寬免其究治其有向充會匪自行投首密報匪首姓名因而拿獲亦一律免罪若投首後又能作綫引拿首要各犯到案究辦除免罪之外仍由該地方官酌量給賞地方文武員弁能拿獲著名首要密實懲辦酌核案情隨案奏請優獎如妄拿無辜擾累閭閻以及縱匪貽害亦卽嚴行參處如此照定章程各州縣有所遵循自必隨時留心實力查緝不敢輕縱玩忽該匪黨亦各知所儆懼庶足銷患於未萌而地方可期安謐矣覆查此等會匪各省亦時有緝助湖北省既經分別輕重酌議章程他省亦應照辦以昭劃一如蒙 俞允 臣部行文該督並湖北巡撫暨各直省督撫將軍都統府尹一體欽遵辦理得 旨如所議行○癸卯以陳濟清爲浙江處州鎮總兵○甲辰上詣 慈福端佑康頤昭豫莊誠壽恭欽獻皇太后前請安○乙巳以京師得雪 上詣 大高殿報謝○劉秉璋奏前准部咨行令川土出口每百斤抽收土稅銀二十兩設卡稽查等因 臣當卽檄司選派准補保寧府知府唐翼祖督辦土稅前往川東一帶清查要隘凡川土行銷湘鄂陝黔等省道路紛歧扼要設卡業將遵辦設卡情形奏陳在案一面由 臣檄派長勝一營壽字兩營分設局卡茲據布政使龔照璣轉據督辦土稅唐翼祖稟稱開辦土稅以來該營營帶等各將所部營勇分派各局卡隨同委員稽查

巡緝極稱得力但各營本係地方防軍一有事端卽須調動如本年川北大足各土匪先後滋事節經抽調一二哨前往剿辦斯時各稅卡巡緝一鬆該局收稅頓形減色蓋川省土匪行銷湘鄂陝黔等省道途數千餘里局卡三十餘處大半孤立邊荒處所萬山叢雜路徑紛歧且土販人結伴同行向多橫悍一見營勇他調或恃衆而肆意闖關或伺隙而潛行偷漏種種情弊防不勝防非有常川駐紮之勇營壯其聲威嚴其堵緝斷不足以收成效而裕權徵查鄂省創辦土稅亦必招募勇營專司緝捕開支口糧擬請卽將現派之長勝一營壽字兩營永遠駐紮分護局卡不再抽調他處以專堵截巡緝之責庶免闖關偷漏之虞至該三營應支月餉及製備軍裝器械銀兩請照部議鄂省土卡招募及本省先年創辦官鹽局招募安定五營之例於所收土稅項下開支口糧仍照舊章以示限制惟川省外接壤疆綿互數千里內則囑匪教匪時思竄動該各營既經永遠護卡地方時有事變防軍勢必不敷調遣應請另行招募以顧地方另募之勇飭仍由籌餉局支給以符舊案等情詳請奏咨前來臣伏查川土收稅事屬創辦非派勇營護卡不足以資彈壓該府請將三營常川駐紮免其更調以重稅款自係正辦但川省人心浮動伏莽時虞先年如大邑蒲江匪類三次焚獄劫囚去年萬縣崧英河及茂州石泉三木匠糾衆謀逆本年川北周蠻刀等嘯聚戕官大足土匪余蠻子等藉打教爲名膽敢與官軍對壘縱經隨時斟酌抽調而分防地面

太多顧此失彼總屬不敷分布現西土稅各卡既留營常川駐護他處不復調遣餉項在於土稅項下開支此後惟有體察情形酌量添募調派而資捍衛下部知之○丁未諭戶部奏遵議楊昌溶奏請將解濟甘肅新餉各員分別獎敘開單呈覽一摺甘肅新餉關緊要所有指數批解各員自應量加獎敘河南巡撫裕寬著賞加頭品頂戴福州將軍希元兩江總督劉坤一湖廣總督張之洞四川總督劉秉璋調任江蘇巡撫前山西巡撫奎俊安徽巡撫沈秉成調任山西巡撫前湖南巡撫張煦陝西巡撫鹿傳霖江西巡撫德馨湖北巡撫譚繼洵調任廣東巡撫前江蘇巡撫剛毅新疆巡撫前陝西布政使陶模河南布政使廖壽豐均著交部從優議敘陝西布政使張岳年湖北署布政使按察使陳寶箴均著賞給頭品頂戴湖北鹽法道翟廷韶著俟升缺後賞給頭品頂戴湖北布政使何樞著賞給正一品封典江蘇布政使鄧華熙著賞加隨帶二級兩淮鹽運使江人鏡著遇有應升之缺開列在前安徽署布政使按察使嵩崑著交部從優議敘江西布政使方汝翼賞給正一品封典江西督糧道鄧蓉鏡四川署布政使德壽四川鹽茶道延燾均著賞加隨帶二級以示鼓勵至湖北布政使王之春等著照部議毋庸給予獎敘餘著照所議辦理該部知道單二件並發○戊申諭兵部左侍郎師曾年逾八旬著加恩免其帶領引見○己酉

上諭

慈禧端佑康頤昭豫莊誠壽恭欽獻崇熙皇太后前請安○以惲彥彬爲內閣學士○加賞資善堂

普濟堂功德林煮賑米石○鄉愚賀奏臣伏讀乾隆四十五年四月內閣奉 上諭制藝以清真雅正為主近年因文體踳駁屢經訓飭凡有衡文之責者尤應悉心甄拔使文風日臻純雅等因欽此九月復奉諭旨嗣後各省巡撫凡遇大比之期必須實力稽察慎密防閑務令闈中積弊肅清士子懷刑自愛庶足以甄別人材振興士習等因欽此 聖訓昭垂允宜萬世恪守乃近來鄉會試四書文藝講訓話者往往參用許氏說文夫說文昉於許氏入之孔孟口中不得謂非後世之書況穿鑿附會題義既多牽強支氣亦易陷罔他如百家諸子湊集成篇詩賦歌詞率行填砌首麗語雜接之制藝體裁均有未當竊恐士子揣摩摹倣漸趨於怪誕支離士習文風關繫非淺至近年場規過寬詭端百出傳卷聯號諸弊久已習爲故常甚者拾寶頂替亦將肆行無忌若將通關節例禁極嚴近日考官尙不敢公然爲之然日久玩法恐有不肖士子生心嘗試若不嚴爲防範則希圖詭遇人人皆無所儆懼而弊將日滋可否請 旨飭下禮部申明禁例於鄉會試嚴行曉諭毋徒視爲具文務使考官慎以衡文不專取新奇之作士子懷於畏法不敢生僥倖之心則文體正而弊端清真才乃可得矣 上諭御史鄉愚賀奏請飭釐正文體並慎防弊端一摺應試文字總以清真雅正爲宗不得穿鑿附會漸趨怪誕至科場關防必須嚴密若如所奏傳卷聯號拾寶頂替積弊叢生尙復成何事體卽著禮部核明禁例於鄉會試前嚴行曉諭勿得視爲具文

○庚戌諭前因山西歸化城副都統奎英奏參署歸化城同知張心泰任意虐民擅造非刑情事當將張心泰先行革職交胡聘之按照奎英所奏各款查明參辦茲據胡聘之奏稱詳查各款除並無科斂勒索均毋庸置議外惟所設刑具用過七眼枷一次係屬因時救弊尙非違例虐民可比懇准免其革職仍送部引見之處著不准行該護撫卹以後遇有叢民交涉事體非命盜重案歸旗員自理者不得率行派員會審如果屬員審理不公卽咨山巡撫查明參辦等語嗣後遇有地方公事著照定例和衷商辦毋得各存意見致滋貽誤該部知道○辛亥諭前因給事中洪良品奏參內閣侍讀薛浚交通杜樞有在外招搖情事當派徐桐懷塔布查辦茲據查明覆奏內閣侍讀薛浚既未與杜樞交結往來原參各節皆無確據卽著毋庸置議已革州判杜樞以職官致有紳號與刑部實人來往實屬衣冠敗類著卽行革職照所擬杖六十徒一年滿徒解回原籍交地方官嚴加管束勿令來京滋事○壬子福潤奏黃河下游青城縣州蒲臺利津及上游歷城章邱濟陽等州縣夾河以內村莊終年浸於黃流民情困苦經前撫臣張曜暨奴才先後奏明籌款遷移派賑撫局道員黃瓊爲總辦候補知縣楊建烈爲提調飭令督率印委官紳擇大堤外附近高阜之處購地蓋房給資遷徙本年六月間已將辦理情形附片奏報在案嗣值伏秋大汛黃水漲發夾河以內一片汪洋歷城蒲臺利津等處未及遷出之民幾有其魚之患幸戶口先已查清新

莊地基亦已購定當飭各該員一面用船拯救一面催令速遷數月以來嚴督趕辦現經一律蒞事並益以齊東縣續請遷移各戶統計遷出厯城章邱濟陽齊東青城濰州蒲臺利津八州縣災民三萬三千二百九十七戶計三百五十村莊設立新莊三百三十九處衡宇齊整經界井然所需經費在四成賑捐項下撥節勘支共用銀三十二萬六千一百十五兩一分六釐各新莊距其舊村或四五里或一二里冬春水退地仍可種藉收二麥之利災民山江湖而登衽席爾田爾宅耕鑿相安莫不感頌 皇仁歡呼得所據總辦道員黃履會同賑撫局司道具詳前來奴才查東省黃水爲災由於河身過窄勢不能容昔漢臣賈讓以徙民爲治河上策明臣潘季馴亦謂濱河之民宜移居高阜是讓地與河實古今弭患之一法今厯城以下遷去沿河村莊以免與水爭地雖不敢謂從此河患之克弭而河身多拓一分卽汎漲少溢一分於治河之道不無裨益當上年籌辦伊始小民徯於安土重遷頗形觀望不安本分者希冀常得賑濟又復多方阻撓各委員開導再三先遷其被水最甚之區災民咸知得所始各樂從計上年前撫臣張曜任內僅遷七百餘戶本年經奴才奏派總辦提調各員在於適中處所分設三局認真辦理前將沿河八州縣夾河以內之民一律遷徙完竣籌辦尙屬妥速該委員等奔馳於暑日霜風之下相宅闢基備嘗艱苦似未便沒其微勞擬懇 天恩俯准由奴才酌保數員按照河工異常勞績請獎以示鼓勵得 旨所

辦尙屬妥速在事出力印委各官准其酌保數員毋許冒濫圖留覽○癸丑諭朕奉 慈禧端佑康頤昭  
豫莊誠壽恭欽獻皇太后懿旨本年順天直隸雨水過多災祲較廣現在天氣嚴寒小民困苦情形實深  
廬念著發給內帑銀二萬兩以資賑恤欽此著李鴻章孫家鼐孫楫遵派委員分投核實散放務使窮黎  
咸沾實惠仰副 聖慈軫念民艱有加無已之至意○甲寅轉錄文爲翰林院侍讀學士以鍾靈爲翰林  
院侍讀學士○許振祿奏豫省河南北兩岸上游各屬歲修經費自上年經臣奏改新章後每年准由司  
庫歲支額款銀六十萬兩爲常年修守之需試辦年來漸臻穩定伏查本年入秋以來雨水過多陰雨連  
綿山水暴發沁黃兩河迭次陡漲水勢勇猛異常兩岸各屬臨黃要工同時生險搶救不遑自夏徂秋鑲  
修幾無暇日而儲備稽料甄石一律用盡仍復奇險環生只得將查封各屬所存料物以及節次提到閩  
省撥稅及兩淮鹽課鹽銀兩共一萬五千兩分給貼補夫價得以悉力趕辦尙未貽誤事機迨至霜清  
水勢微弱兩岸各工得保平穩化險爲夷業將辦理情形於霜降摺內馳陳在案現在河流順軌共慶安  
瀾堪以上慰 宸厪核計本年兩岸七屬土埽甄石等工約共用銀五十萬四千餘兩內用上年別存稽  
料甄石值銀七千餘兩又用本年南岸上三屬採割堤壩草力工銀五百餘兩向在河銀內支發又用閩  
省鹽稅銀一千兩兩淮鹽課鹽銀一萬五千兩又用本年七屬四次歲支司庫銀四十八萬兩現除南



北兩岸七屬別存甌石值銀六百餘兩留工備用外計實不敷銀一千餘兩又河防局委辦各工約共用銀十二萬一千餘兩內除上南屬鄉工大屬增培土工用銀五千餘兩外餘皆概已買石加拋無存內再除用上年餘贖銀七百餘兩准入籌管列收外尚不敷銀八百餘兩所有不敷銀兩統俟各工核明細數請由臣自行彌補斷不准另請添款找發以上所用銀數臣逐款勾稽再三確核委係實工實用下工部知之○許振祿奏現准工部咨核復豫省河防局十七年承辦工料銀數又嗣後工需請飭歸入比較各摺片恭錄 諭旨咨行欽遵查照前來查光緒十六年改革原奏歲額六十萬兩以四十八萬兩歸各屬員承辦另提十二萬兩歸河防局籌添料石先事預防山臣主之原請開單報銷在案仰蒙 聖主鴻慈俯從所請故臣得以督率印委各員升逐處防維不遺餘力今工部責令分案題銷並具圖說取其印委切結一併送部查核此爲慎重公款起見在部臣主於守法援引舊例施之於尋常歲辦之工自屬可行而於臣今日所提十二萬之數則似有未明其意者請爲我 皇上敬陳之臣愚以爲河工大險恃法不如用人如以恃法論則從來所辦報銷案工部知之河工亦知之故自每年添款及鄉工報銷之千數百萬兩而未聞其不合例也如以用人論則臣近此蒙 聖主破格之 恩准臣改革從事而比年大險橫生亦均次第搶補幸奏安瀾至添料添石固有不盡合例者矣臣於四十八萬之報銷則悉照部章至

另提十二萬兩則必求開單者此誠有實在情形不敢一字欺飾也原臣設立河防局初意厥有二端一則恐糧員之遇險推諉藉口無錢無料故提此鉅款爲先事預防之資一則恐糧員之不實不盡故撥委官紳爲臨時匡救之用而限此十二萬兩只准纖悉到工不准絲毫入局並不准於此開支薪水此河南官紳吏民罔不知之卽如今歲之得保鉅險爲實有一款已用過十一萬數千餘兩其餘則補辦工金門所裂之堤總計兩事此不能分案題銷者也又多方買石隨處搶堵險未平則必加拋險已過則卽停止此不能繪圖貼說者也且以所用各員而論凡不諳修守精神稍懈之員隨時斥去至所用本地各紳其身家性命皆在堤下稍不盡心禍且先及故雖有河防監工名目實則扶助糧員之所不及河防者防各處之險監工者監各處之工人不一處事無定所板蓬遷轉日在風沙泥水之中既無舉辦之工卽不復頒給印信又此款十分之九皆付買石費豈可矣於委員監工者無與此不能取其印委切結者也且恐陋無知只能據實辦理伏維 聖主如天之仁憫 臣才短心誠不以文義相難可否籲懇 天恩俯准仍照改章原奏河防局十二萬兩歸入撥實開單報銷辦理 勅部量少從寬之處出自 高厚鴻慈河工幸甚得 旨著照所請工部知道

十二月乙卯朔 上詣 慈禧端佑康頤昭豫莊誠壽恭欽獻皇太后前請安○諭劉坤一奏請緩徵鹽

地折價錢糧一摺兩淮泰州海州所屬各場本年夏間雨澤稀少嗣又被風被潮收成減色若將新舊折價錢糧照常徵收盡力實有未逮加恩著照所請所有富安安鹽梁垛東臺何垛劉莊伍祐新興廟灣九場上年二月開徵之光緒十七年歷徵十六年分折價同丁溪草堰二場因災緩至光緒十八年麥熟後帶徵之十六年分折價及本年秋成後各應帶徵之光緒十三年分並未屆帶徵之十四十五年各年原緩折價著一併緩至來年秋成後由遠而近每年帶徵一年板浦中正臨興三場本年秋成後帶徵之光緒十七年分蕩地折價著緩至來年麥熟後徵收其來年二月應徵之光緒十九年歷徵十八年分蕩地折價著緩至來年秋成徵徵以紓鹽力餘著照所議辦理○福潤奏白茅墳海口合龍請獎敘出力各員允之○丙辰諭 慈禧端佑康頤昭豫莊誠壽恭欽獻皇太后 至德光昭 鴻猷丕被 勳九重之宵旰措四海於乂安歸政以來朕侍 臚問 安長聆 懿訓仰見 慈躬康強悅豫菲祿聯臻朕心實深歡忭甲午年欣逢花甲 昌期壽宇宏開朕當率天下臣民聯歡祝 嘏所有應備儀文典禮必應專派大臣敬謹辦理以昭慎重著派禮親王世鐸慶郡王奕劻大學士額勒和布張之萬福錕戶部尚書熙敬翁同龢禮部尚書崑岡李鴻藻兵部尚書許庚身工部尚書松淮孫家鼐總辦 萬壽慶典該王大臣等其會同戶部禮部工部內務府恪恭將事博稽典故詳議隆儀隨時請旨遵行○己未 上諭 奉先殿

壽皇殿行禮○辛酉諭本日理藩院據散罕郡王呈報公主圖寢暨該郡王墳墓祠宇府第等處被賊焚燬該郡王無力修葺呈請據情代奏籲懇恩施等語上年熱河匪徒縱擾散罕王旗被害情形殊堪憫惻著賞銀一萬兩由戶部撥發交該郡王達爲林爾達克祇領在公主圖寢各處趕緊修理用示體恤○將式芬奏恭查順治十二年六月 命工部立內官十三衙門銀牌敕諭曰中官之設雖自古不廢然任使失宜遂貽禍亂覆轍相尋足爲鑒戒朕今裁定內官衙門及員數職掌法制甚明但有犯法干政囑託內外衙門交結滿漢官員越分擅奏外事上言官吏賢否者即行凌遲處死定不姑貸特立鐵牌世世遵行欽此仰見我 世祖章皇帝懲前毖後杜漸防微 列祖 列宗稟承詒謀永遠遵守所以 本朝宮禁肅清罔敢觸犯二百餘年超越前古乃 臣訪聞本年六七月間不記日期刑部值日堂官在 西苑門外直廬候事突有一太監名金九者徑到直廬專尊刑部堂官薛允升手持一紙關係地畝案件向薛允升再四囑託詢侍郎未曾接受該太監悻悻而去刑部別堂官暨同日值日各衙門堂官見之均異常駭愕而無一陳奏者聞該太監先已囑託刑部尚書貴恆該尚書是否應允並該部如何辦理無從得悉此事臣風聞日久恐有傳說未敢遽行參劾近細加確查實有其事不敢以事關數月緘默不言以違 祖制而紊朝綱應請 旨欽派公正大臣確切查辦或 命尚書貴恆侍郎薛允升據實明白回奏不得再有

徇職 上諭御史蔣式芬奏內侍囑託大員公事請飭查辦一摺據稱本年六七月間有太監金九者在西苑門外直廬向刑部侍郎薛允升手遞一紙關係地畝案件再四囑託該侍郎未曾接受聞該太監先曾囑託尙書貴恆是否應允無從知悉等語著貴恆薛允升明白回奏○壬戌諭前據御史蔣式芬奏參內侍囑託大員公事等語當令貴恆薛允升明白回奏茲據貴恆奏稱並無太監囑託地畝案件薛允升奏稱本年夏間在西苑門直廬有人手持紙條投遞拒不肯收其人亦即走去忽遽之間未及問其姓名各等語該御史所參各節既據貴恆等覆奏或並無其事或無從追獲卽著毋庸置議嗣後如有此等情事各該大臣卽應據實奏參照例懲辦以昭炯戒○甲子 上諭 慈福端佑康頤昭豫莊誠壽恭欽獻皇太后前請安○戊辰戴恩溥奏查科場條例內載鄉會試出題考試次日士子務盡放出以是日未刻爲限繳卷淨場不准給燭又載凡鄉會試天晚不准收卷卽行封門各等語恭查乾隆五十四年奉 上諭向來鄉會試士子出場之日不准給燭開本科鄉試有遲至夜分始行交卷出場者以致昏黑易於混雜滋生弊端殊非慎重科場之道嗣後凡鄉會試於士子出場日期知貢舉及監臨等務先出示曉諭屆時嚴催早行交卷斷不准其給燭以杜弊竇欽此又光緒元年奉 上諭鄉會試爲抡才大典理宜嚴肅交卷亦有定章乃近來士子往往不守場規出號喧鬧其換卷傳遞等弊恐亦在所不免交卷亦任意

遲延不遵定例竟有遲至夜間始行交卷者實屬不成事體嗣後知貢舉監臨鄉歷大臣務當申明預章認真整頓如有前項弊端即著照例辦理欽此每屆鄉會試年分知貢舉監臨等均先期出示曉諭復於各號舍粘貼剴切告示又飭委官等逐號嚴催諄諄告誡不啻三令五申乃該士子等視為具文屢催罔應往往日入時未交卷者尚有一千餘名或七八百名之多時當昏夜號門不時啟閉往來混雜防範難周越號傳遞之弊難免乘機而起若照例望卷扶出不但人多礙難辦理且恐恃眾不服轉滋事端聞近科竟有遲至次日卯刻始行淨場者違 功令而啟弊端莫此為甚臣維立法之初自出題至次日未刻約有兩晝夜之久敏速者固能早期完卷遲鈍者亦可如期出場其所以挨磨不交者或故趁餘暇以售槍替之技或坐延時刻以待僱倩之文詭計百出日甚一日相應請 旨飭下禮部順天府申明舊例妥議章程並臨場責成知貢舉監臨等或考試日嚴定限制凡有給燭交卷者均以違式論或另議嚴切誠諭務令士子等恪守場規不敢違例給燭庶幾弊習漸除於 朝廷慎重取士之法或可少裨於萬一

上諭御史戴恩溥奏請飭整頓場規一摺鄉會試交卷本有例定時刻若如所奏遲至次日卯刻始行淨場何以肅場規而清弊竇著禮部順天府申明舊例妥議章程奏明辦理○庚午諭王文韶譚鈞培奏剿辦土司地方滋事妖僧完竣請將出力人員及疲玩土司分別勸懲開單呈覽一摺雲南騰越屬致撒

土司地方本年閏六月突有妖僧們聚臘以妖術煽惑愚民糾眾滋事經王文韶飭總兵張松林等派兵前往拿辦先後將該妖僧及餘匪等擒獲正法邊境現已乂安在事出力人員尙屬著有微勞自應量予獎敘所有開復副將劉萬勝著以總兵記名簡放補用副將鄧光珍著俟補副將後以總兵記名簡放都司潘英華著免補都司以遊擊儘先補用遊擊蔣祥華著免補遊擊以參將儘先補用都司何金澄著免補都司以遊擊儘先補用守備江正科著免補守備以都司留於雲南儘先補用千總任遇陞著以守備儘先補用已革花翎遊擊顧得勝著開復原官翎枝以遊擊仍歸原省補用並免繳捐復銀兩已革補用知縣閻德溫著開復原官升階以知縣仍留雲南歸原保班補用並免繳捐復銀兩兩贖越屬司獄葉樹勳著以府經歷在任遇缺儘先補用南甸宣撫司刁定國著賞戴花翎千崖宣撫司刁尙廷著賞換伯奇巴圖魯名號達副宣撫司刁思治著賞加副將銜以示鼓勵臘撒長官司蓋定達所屬無能始終玩誤著卽行革職戶撒長官司賴天福近在咫尺置若罔聞著摘去頂戴用示懲儆○邵友濂奏恆春府不力社番滋事經臣派令記名提督臺灣鎮總兵萬國本記名提督張兆連督兵剿辦當將攻克吧什囉社情形附片奏奉 硃批知道了著卽飭令萬國本等迅速會剿以清餘孽欽此欽遵轉行去後查官軍既克吧什囉社卽就該社紮營一面密約後山各營規取草埔後社以礮爲號八月十二等日該番截我運道

乘夜撲營攻打微曉猖獗異常十六日五鼓山後敵作萬國本張兆連分營十二營前後各分兩路蘇令  
屯丁化番嚮導進兵該番阻扼淡水坑伏擊憑高極力抵拒官軍一鼓作氣奪其所據進逼草埔後社山  
勢險阻林菁密曲折之際隘卡重疊路徑尤窄只容一人官軍驟以開花礮洋火箭進逼屹然不動各  
營復選精壯單鎗捷足魚貫而前自午至酉更番疊上卒不能入萬國本熟商張兆連用大礮接鎗連環  
耳擊十七日黎明山谷驟震各營弁勇番丁聲勢百倍陣亡接應兵不回顧每寨一卡即於卡內關路挑  
夾節節進剿隘卡盡爲我奪該番聚保大社力漸不支日哺官軍乘勢猛攻將草埔後社立時平毀四面  
追殺斃番八十餘人奪獲洋鎗一十七桿鏢刀各百餘件擒獲番目加必姑柳龜令萬貴等四名搜捕首  
犯零阿零父子未獲十八日夜颶颶驟來山溪暴漲沙飛石走林木齊摧各營棚帳鍋竈登時盡失萬國  
本張兆連激勵將士忍飢耐寒於狂風猛雨中擊鎗屹立兩晝夜二十一日乃得引火爲炊伐木樹營以  
資守衛該番橫被風雨無社可歸各竄林藏呼號四徹追風定雨驟官軍漸整隊伍廣購眼線纔知零阿  
零嘯聚兇番二三十人竄匿家新路二十八日官軍猝往掩捕該番搜出不意憑倚深林且竄且拒弁勇  
林外堵截斃斃數番冒險入林將首犯零阿零生擒到營二十九日搜獲從犯加別一名九月初三日又  
獲吧咕一名先後發交恆春縣署知縣陳文緯訊明一併軍前正法初八十六二十等日各營搜剿餘匪



迭有新獲首級暨鎗械等件萬國本張兆連撫定餘番督同恆春營縣安撫營後赦令先獲番目加必大  
木耶失炎等回山約束改射不力爲善化社另立社長督與就近莊民永遠相安官軍先後陣亡勇丁化  
番四十四名被水衝斃十三名受傷五十一名會同上次吧什囉社傷亡各勇分別查驗卹賞暨十月  
十八日萬國本張兆連督帶各營由內正一律拔隊分別回防節據稟報前來查射不力素爲恆春悍  
社與就近莊民仇殺日久此次殺斃民人張大包等二名係阿零父子所爲該番怙惡不悛膽敢糾衆  
迭犯楓港迨至官軍臨剿尙復懸險拒捕實爲罪大惡極業經捕獲爲示洵足以彰國法而快人心官  
軍涉險縋幽深入瘴地衝鋒陷陣番不顧身又值風雨爲災露立兩晝夜之久尤非歷年剿辦情形可比  
數旬迭克悍社捕獲首要各犯肅事迅速地方安謐在事人員不無微勞足錄謹擇尤開單仰懇 天恩  
准照所請分別給獎其餘出力各員并可容入海防五年保獎案內核保以示鼓勵 上諭邵友  
濂奏剿平滋事番社擒獲首要各犯正法在事出力各員開單請獎一摺本年閏六月間臺灣恆春縣境  
射不力社番聚衆滋事邵友濂派總兵萬國本等督兵先後將各番社卡攻克擒獲首犯阿零從犯加  
別吧咕等多名正法現在地方已就安謐在事出力各員均屬著有微勞自應分別給獎所有單開之總  
兵萬國本著賞換奇車伯巴圖魯名號提督張兆連著換仲伯德恩巴圖魯名號均著交部從優議敘遊

學萬國標著免補本班以參將儘先補用並賞給勇巴圖魯名號副將徐元福著免補本班以總兵記名簡放並賞給標勇巴圖魯名號千總萬國棟著免補本班以守備儘先補用並加都司銜遊擊張正玉著免補遊擊以參將改留四川儘先補用並賞換花翎守備例常賞著免補本班以都司儘先補用並加遊擊銜把總俞福榮著免補本班以千總儘先補用並加遊擊銜餘著照所請辦理該部知道單併發○高燮曾奏五貢就教人員例得註冊銓選 朝廷嘉惠士林至周巨源乃近年以來銓選者不必生存存者不能銓選推究其由皆以候選人員物故家屬不知呈報地方官無從查詳又州縣漏報病故處分本輕復不加意雖申明例催令查報亦且視為具文用是陳陳相因至百餘歲之人猶有掛名銓冊者每選一缺則以病故報再行補選又復如是輾轉延宕實缺虛懸於學校殊有關繫臣查例載年逾七十之教職內有精力尙健堪以留任者亦祇准展限五年概行令其休致等語是年逾七十有五已仕者且宜退罷未仕者豈宜濫進可否 飭下吏部變通辦理檢查冊檔凡五貢就教人員計現年已逾七十五歲者詳細摘出每屆年終彙奏一次卽行註冊以便後來換次銓選庶年健儒生均得及時自効 上諭御史高燮曾奏五貢就教人員宜變通辦理如計年過七十五應請彙奏註銷以便後來換次銓選等語著吏部議奏○曹志清奏倉儲之設關繫最爲緊要豈容有奸徒暗中把持剋扣偷漏以致弁兵餬口維

艱怨聲載道近數年來因倉米虧短屢經有人參奏奉 旨查辦並拿獲倉匪全才李森黑龍趙狼狽等  
二等交刑部治罪而偷漏剋扣之弊反益加甚人言嘖嘖竊謂巨蠹未除倉豺狼而問狐狽終不足以示  
懲聞著名巨蠹至狡極猾者莫如南新倉小韓二即韓毓霖原名韓升與伊父韓順伊叔韓大均曾充南  
新倉花戶於光緒五年間因虧短米石犯案舉家報逃而該匪巧於彌縫仍暗中把持南新倉事務影射  
牟利廣置產業並結交各倉監督以挾制各倉花戶凡偷減等事皆聽韓毓霖一人指揮尤可駭者伊以  
積年倉匪竟敢膽捐知縣分省補用旋黃緣在倉當差派有總辦南新祿米海運三倉名目伊恃身有護  
符明目張膽將各倉好米私拉變賣發放俸甲各米時先將霉爛之米充放間有好米亦多摻和灰土並  
間有私造小斛每石扣減二斗之說上年南新倉放正藍旗甲米因該旗佐領爭執斛面韓毓霖喝令將  
佐領兇毆該佐領控告有案今年夏間私將祿米倉廩座官廳拆修將好木料盡行偷換與倉監督花戶  
分肥現在南新倉放各粥廠賑米多係霉變不堪食用之米就食窮民同聲唾罵似此種種不法實爲倉  
中巨蠹若不從嚴懲治則 天庾之正供幾同伊家之私鑒可否請 旨特派大員嚴密查辦或拿交刑  
部認真審理並提全才黑龍趙等領案則鬼蜮之伎倆不難畢露而虧短之積弊庶可少息 上諭御史  
曹志清奏南新倉著名巨蠹小韓即韓毓霖把持倉務種種不法請飭查辦等語著戶部堂官倉場侍郎

確切查明據實具奏○諭本年奉天府屬被水災經加恩截留漕糧賑濟小民諒可不致失所惟念來春爲日方長仍宜豫籌賑撫著再加恩賞發京倉米四萬石卽著孫家鼐孫楫分飭各屬核實散放以惠窮黎○乙亥諭朕欽奉 慈禧端佑康頤昭豫莊誠壽恭欽獻皇太后懿旨甲午年爲余六旬壽辰皇帝率天下臣民臚歡祝嘏特派王大臣等舉行慶典具見誠敬之忱余歸政以來仰荷 昊蒼眷佑 列聖垂庥用能膺受蕃釐康強逢吉茲以花甲初周皇帝摠攬日之誠治敷天之慶歡欣稱祝予若御而不受轉似近於矯情惟念海宇雖已乂安民氣極宜培養每於皇帝侍膳問安之際以去奢崇儉愛育黎元諄諄訓誡皇帝當仰體此意以國計民生爲念孜孜求治俾四海咸臻樂利物阜民康養志承歡孰大於是正不在備物將忱也此次辦理慶典王大臣等於應行典禮查照舊章請旨遵行外其餘一切用款務當力求撙節毋得稍滋糜費以副余慎儉節儉體念閭閻之意中外諸臣其各勤職守共濟時艱內而王公一二品文武大臣外而將軍督撫都統副都統提督總兵照例應進貢物緞疋均著毋庸進獻以示體恤本年特頒內帑賑濟順天直隸貧民嗣後著每年發銀二萬兩交順天府尹直隸總督籌濟窮黎甲午年每省各賞銀二萬兩交奉天吉林黑龍江各將軍兩江陝甘四川閩浙湖廣兩廣雲貴各總督江蘇安徽山東山西河南陝西甘肅新疆浙江福建臺灣江西湖北湖南廣東廣西雲南貴州各巡撫核實散放均

由節省內帑項下給發用示行慶施恩有加無已之至意欽此朕欽奉 慈訓祇切遵承將此通諭知之  
○諭載遷奏偶染風寒懇恩賞假並將歲暮致祭 泰陵之差另行派員前往一摺致祭 陵寢典禮攸  
關豈容屢次請假疾病推諉載遷著傳旨申飭所有 泰陵歲暮致祭仍著載遷恭詣行禮其所請賞假  
及另行派員前往之處著不准行○諭吳大澂奏耆紳品高行潔懇恩優獎一摺據稱湖南在籍紳士前  
湖北候補道周樊收品力學爲守兼優樂道安貧堪爲士林矜式等語周樊著賞加四品銜以資觀感○  
諭國家論功行賞本有一定章程不得越級請保致涉冒濫近來各項勞績保舉往往不按定章率行請  
獎殊不足以昭核實嗣後各部院衙門遇有保案務須謹守成例所請不准過優各直省督撫亦當詳查  
確實嚴核保舉毋得虛張功績濫保多人用副朝廷慎重名器至意○李慈銘奏治國之要惟賞與罰取  
臣八柄二者爲先罰固不可稍踰賞亦豈可或濫 肅清康熙乾隆兩朝 享國久長 慶典 武功獲指  
雖盡其時內外臣工雖屢逢 恩詔論功行賞而班序秩然未有越等者今則外官之道員多至二品其  
封皆至一品矣知府同知多加三品其封皆至一品矣牧令大半四品領尉大半五六品其封率至三四  
品矣甚至一捐班之丞倅或錢緣出洋或挂名海運一保兩保已道員而紅頂矣此猶言在外者也內而  
翰林之編檢預名一典禮之京師加侍講銜其優者加花翎有 京察者保簡放後加二品銜且驟然而

冠珊瑚頂以七品而換二品矣六部之主事得一小事之議敘卽加四品銜其優者加花翎或三品矣夫  
寄人竊位則志士傷心倖者冒功則勞臣奪氣竊者人君之所以進退賢愚人臣之所以奔走吏士得  
之太易則人不知恩予之太驟則士無由勸進至尊卑不別等級不明長僞士之浮囂惑小民之視聽甚  
非所以尊 朝廷清流品也蓋倖門不塞則士習無由端流品不分則人心無由正人心日壞士習日凌  
小臣以此爲能大臣以此爲市而欲求官吏之守法天下之致治是猶背日而求景北轍而圖南也近日  
恭奉 上諭舉行 慈禧端佑康頤昭豫莊誠壽恭欽獻崇熙皇太后六旬萬壽慶典屈鴻勳佑欽治普天下  
慶施 恩自有 成憲 風聞工部於未奉 旨之先已派司員六十人近日派至八十餘人甚至堂官  
互相訾爭傳爲笑柄各衙門大率如是伏讀 懿旨有云此次辦理慶典王大臣等於應行典禮查明舊  
章請旨遵行外其餘一切用款務當力求撙節勿得稍滋糜費仰見 皇太后聖懷謙抑念切民依燭照  
幾先無微不至恐諸臣相沿積習不能仰體 聖心踵事增華惟務博大近以爲鑽營者侵蝕之地遠  
以爲夤緣者保舉之階所關風氣實非淺鮮伏望 嚴飭各部院堂官慎選司員力杜情面勿長浮僞而  
啟觀視嗣後如遇有保舉務當謹守成例按照官階弗得越級躐等以厚風俗以惜名器並 飭下各督  
撫懷遵舊章不得以 朝廷官銜爲屬吏夤緣之餌虛張力役濫保多人再有效尤予以嚴處則天下幸

英 上諭御史李慈銘奏各衙門恭辦 萬壽慶典風聞工部於未奉旨之先已派司員六十人近日派至八十餘人預爲贅緣者保舉之階所關風氣實非淺鮮請飭各部院堂官慎選司員力杜情面等語著各該堂官等於應派司員須揀派熟悉禮儀之人敬謹襄辦不得瞻徇情面率派多人濫竽充數以昭慎恪而重禮典○上詣 奉先殿 壽皇殿行禮○丙子命楊儒出使美國兼日國秘國欽差大臣○丁丑加賞梁家園百善堂煖廠米石○辛酉諭軍機大臣等有人奏順天府尹孫楫近來驕怠益甚遇事任情接見僚屬動輒呵斥前東路驛同知郝聯薇素有吏弊被其辱罵憤而自縊其署中公事尤多積壓等語著派徐桐翁同龢按照原參各節確切查明據實具奏原片均著摘鈔給與閱看將此各諭令知之○戊寅 上御紫光閣賜蒙古王公筵宴並閱習撲營貫校○諭御史余聯沅奏請飭各督撫勸求吏治認真考核州縣分別獎懲等語州縣爲親民之官民生休戚所關全在地方官加意講求盡心經理豈容不肖官吏濫竽其間卽著各督撫督同藩臬道府於所屬州縣隨時考察倘有玩視民艱及圖茸不職之員卽行從嚴參辦毋稍姑容以肅吏治○余聯沅奏理學之傳以躬行實踐爲宗文章之著以扶世翼教爲正況乎心存忠愛不愧社稷之臣蔚起詞章克纂風雅之緒在昔游夏文學四科並列比箕謨三仁同稱凡茲修應同獎許正不必叩東山而請益謁泗水而橫經也伏見楚臣屈平爲楚同姓與其休戚值

國步之艱難陳苦口而涕泣懷王不悟繼以嘔喪子蘭之譖其於新尙信而見疑忠而被謗以至九歌之賦反覆詠歎天問之作鬱悵侘傺闕有芳而自惜荃不察而徒傷卒至懷沙而從彭咸被髮而謝漁父如斯人者洵可謂與天地比壽同日月齊光者然而離騷一編開千古詞賦之祖後世且名之爲經言必稱夫楚辭敬且溯夫湯禹美人香草比寄慨於榛莽離騷女羅同寓言於狐鬼以彼纏綿之至性何害於恢詭之微詞所以馬遷作傳稱其兼國風小雅之思朱子集注謂其增三綱五典之重而不敢直以詞人之賦視之也考屈平生於周顯王二十六年私淑未遑流風尙存向使出於定哀之間應在弟子之列溯其大節昭著遺經炳蔚允宜從祀兩廡報以千秋如韓愈歐陽修立朝雖著其風節而重在文章諸葛亮文天祥報國雖矢以忠誠而無多著作皆已享夫特豚而與蘭絲竹若屈平者固兼韓愈歐陽修諸葛亮文天祥未備之嫩而合而一之且爲韓愈歐陽修諸葛亮文天祥先事之導而等而上之者也況勝國之臣如黃道周劉宗周以講學之儒勵忠貞之節猶蒙 列聖之褒准厠諸賢之位而屈原以龍比之操開風雅之宗數千年未荷闡揚豈非缺典恭逢我 皇上聖學昌明羣材蔚起發潛德而表絕學鑒往古以示來茲相應請 旨飭下禮部詳議將楚臣屈平准其從祀 文廟以勵臣節而重儒修 上諭御史余聯沅奏楚臣屈平請從祀文廟一摺著禮部議奏○己卯諭倉場侍郎祥麟等奏庫儲銀兩被竊請將廳庫



各員分別蹟履一摺據稱坐糧廳通濟庫於本月十九日失去銀三千兩現將庫役人等訊究等語廳庫承地理應嚴密稽查豈容稍有疏失乃竟被竊庫銀至三千兩之多殊屬疏於防範通濟庫大使莊濟著先行交部議處坐糧廳漢監督沈錫晉並著交部議處至滿監督如松雖據報稱因公出署應否免議仍著吏部照例辦理所失銀兩著祥麟等督飭各該地方官將看庫兵役人等嚴訊究辦○諭張煦奏知縣虧短交代請革職監追查抄等語山西暫革知縣郭榮金前在懷仁縣任內虧短正雜銀兩及米豆等項為數甚鉅勒限嚴追迄未完繳實屬玩延郭榮金著即革職監追由督撫提集經手丁書人等究明是侵是挪照例嚴辦該革員任所寓所資財即著先行查抄其原籍家產並著直隸總督一併抄存備抵以重庫款○諭巡視東城御史恩溥奏東城副指揮一缺請照西北兩城調補之例先儘五城差委之熟悉地方情形人員留補一摺著吏部議奏○庚辰諭福潤奏知縣虧短交代銀兩請分別革職勒追一摺山東前署泰安縣知縣已故知縣汪瀛代理高苑縣知縣候補知縣姚萬傑虧短正雜各款為數甚鉅均著暫行革職勒限完繳逾限不完再行從嚴參辦已故前招遠縣知縣董家瑞已革前署鉅野縣知縣畢炳炎交代結算已久並未解繳尤屬玩延董家瑞著即行革職同已革之畢炳炎均著查抄任所寓所資財並將畢炳炎照例監追一面飭提經手書吏人等嚴訊是侵是挪按律擬辦董家瑞畢炳炎原籍寄籍家產

並著安徽湖北各巡撫順天府府尹一併查封備抵以重庫款○壬午 上御中正殿閱跳步扎○癸未  
始祭 太廟 上親詣行禮○甲申 上御保和殿賜蒙古王公宴○是年統計出口貨直銀一萬零二  
百五十八萬三千五百二十五兩進口貨直銀一萬三千五百十萬一千一百九十八兩相抵虧三千二  
百五十一萬七千六百七十三兩凡徵貨稅銀二千二百六十八萬九千五百十四兩

臣朱壽朋敬編

臣張毓英恭校

光緒十九年春正月乙酉朔元日節升刻 上詣 奉先殿行禮實刻詣 堂子行禮辰刻詣 慈寧宮  
行禮 御中和殿受禮太和殿受賀已刻詣 壽皇殿行禮○諭明歲恭逢 慈禧端佑康頤昭豫莊誠  
壽恭欽獻皇太后六旬萬壽仰維 懿德普被寶區慶洽敷天歡騰率土允宜殊恩特沛加惠藝林著於  
本年舉行癸巳恩科鄉試二十年舉行甲午恩科會試俾茲多士忝觀光用副朕錫類延 釐壽世作  
人至意該部卽遵諭行○丁亥 上詣 壽皇殿行禮○諭上年順天直隸各屬被水成災業經分別蠲  
緩糧租並截撥銀米小民應不致失所惟念今春青黃不接之時民力未免拮据加恩著將通州三河武  
清寶坻薊州香河寧河霸州保定文安大城固安永清東安大興宛平涿州順義涿州清宛安肅新城博  
野蠡縣雄縣安州高陽河間獻縣肅寧任邱交河景州故城東光天津青縣靜海滄州平鄉清河階州清  
鹽東明長垣豐潤玉田深州武強懷安平張家口廳等五十二州縣釐成災五十六七八九分村莊應納  
本年春賦地丁錢糧各項旗租著緩至本年秋後徵收其歉收之四分村莊應納本年春賦地丁錢糧各

項著緩至本年麥後啟徵又勘不成災之夏鄉房山滿城定興唐縣容城完縣祁州南皮鹽山無極南和任縣雞澤元城大名南樂聚強隆平寧晉定州等二十一州縣徵收三四分村莊應納本年春賦照常徵收其原緩至本年麥後啟徵之款收四分村莊應納光緒十八年並節年地丁錢糧各項旗租因款收三分村莊應納節年地丁錢糧各項旗租均著緩至本年秋後啟徵凡有應徵屯米穀豆草束鹽課學租通津二幫屯租旗產錢糧海防經費河道錢糧儲備軍餉恩庫租永濟庫租兵部馬館租鑾儀衛租代徵租及出借倉穀籽種口糧牛具等項隨同正項糧租分別緩徵津軍賑源課納糧地畝內有坐落武清天津二縣者歸入該二縣災歉村莊一併查辦以紓民力該部卽遵諭行○辛卯祈穀於上帝○上詣慈禧端佑康頤昭豫莊誠壽恭欽獻皇太后前請安○壬辰刑部左侍郎清安因病奏請開缺允之○上詣中正殿拈香○癸巳長順富爾丹奏查光緒十六年間奴才等奉旨整頓通省釐捐當經派員分往各處稽查弊竇嗣因省城雜貨行立有自辦貨名全行漏捐出示曉諭復爲奸商阻撓當於本年七月間據實具奏在案查吉林釐捐一項以省城與長春兩處爲通省暢旺之區向來歸商包納以致遞年虧短自非專員經徵不足以資整頓當派協領富通山總理省城釐捐以吉林府爲會辦佐領慶安總理長春釐捐以長春府爲會辦現在省會商人頗知前非遵章納釐較有起色獨長春各鋪商意在把持迭

經長春府開導終置不理復據慶安稟報該城紳商串通一氣牢不可破並有如果歸官收捐即行罷市之說察訪市面知抗捐者僅止闕城大會首商二十餘人其他則隨聲附和等情前來奴才等查長春自光緒四年停辦日釐改爲貨釐按市錢一千抽收一分每年定額十萬千五年仿照奉天章程將一分減去三釐改爲七釐稍有虧額七年卽改爲徵徵均經奏明有案近則遞年虧短幾將及額之半推求其故實由衆商效從前省城漏捐之尤將自辦貨不歸棧店報捐而會商亦因釐無定額任意侵吞以致該會代抽貨釐預留細帳兩本數目各不相符上年曾派協領吉陞阿委用知州吳瞻晉前往會同該府調查釐捐帳目僅據呈一本以致未能盡抉其弊追帶查一年土稅斗稅各存盈餘至一萬數千之多經奴才等飭將此項餘錢易銀解省交司存庫此卽會商侵吞捐款之實據也商會有二曰大會曰二會以資本之厚薄分差等而實則統謂之公議會此項名目無非商人私立其始不過會議善舉其後遂至於把持行市包攬捐稅近則地方公事凡有涉於商者亦待酌議幾至會有極而官無權蓋劣紳奸商往往借會地爲壟斷以侵權而罔利此次派員經徵釐捐該會無利可圖遂布散流言煽惑紳商恃衆挾制揣其意以從此中止仍歸商包納則每年數萬公款出自衆商仍可由我染指而衆商亦得執儘徵儘解之說任意隱報各有私圖相率阻抗風俗之壞一至於此且該會之所藉口者無非向歸包納今日派員經徵但

欲祛除積弊並未於定章外另有加增卽以原捐輕重論內省盤捐值銀一兩約收二分吉林獨烏拉伯都訥二處則收一分餘收七盤長春本照省章並無獨重之說且吉林章程報捐僅止一次各外城間有來省販貨者運至該城不能不與自辦貨一體抽盤以杜影射長春貨自外至並不來省販貨絕無重捐之累是吉林盤捐較內省爲輕而長春盤捐則較本省各屬尤輕以捐款獨輕之區而爲特衆抗捐之舉若不嚴加懲創實無以祛惡習而儆效尤奴才等現派熟悉該處情形之靖邊親軍統領明順前往長春會同總會辦督爲開導曉以大義如果始終抗違惟有將爲首紳商按例懲辦至大會名目各屬皆均不免把持情弊容俟奴才等再行察訪確實一體禁革以挽頽風報聞○甲午寅刻 上詣 太廟行禮辰刻詣 慈禧端佑康頤昭豫莊誠壽恭欽獻皇太后前請安○御紫光閣賜蒙古王公筵宴○乙未轉阿克丹爲刑部左侍郎調裕德爲刑部右侍郎以克們泰爲工部左侍郎○諭前據御史李慈銘奏順天府府尹孫楫有訶斥屬吏積壓公事等情當派徐桐翁同龢確查茲據查明覆奏前任東路驛同知郝聯薇係屬因病出缺並非被辱自縊至府尹署中應辦公事檢查簿書亦無積壓卽着毋庸置議○戊戌 上詣 奉先殿 壽皇殿行禮○己亥 上詣 大高殿 壽皇殿行禮○御保和殿賜廷臣筵宴○諭陶模奏查明各屬被災地畝請將應徵課銀糧草分別蠲緩一摺甘肅新疆吐魯番等屬州縣本年被凍被

雪被水被旱地畝成災若將應徵課銀糧草照常徵收民力實有未逮加恩著照所請所有吐魯番屬沙河子等莊被災較重地三千九百八十畝零額徵國課銀九百五十兩零著悉數蠲免被災較輕地四千八百三十二畝零額徵國課銀一千一百六十兩零著自光緒十九年起分作三年帶徵銀西屬屬大有莊等處地一千一百七十九畝額徵糧八十九石零著概予蠲免迪化縣屬黃草梁等處地三千九十七畝零額徵糧一百二十石零奇台縣地一萬六千九百八十一畝零額徵糧六百六十六石零該縣應徵糧石並奇台縣戶民借領籽種一百五十石零均著緩至十九年秋後帶徵阜康縣屬三工台地八百八十畝額徵糧二十六石零均著蠲免莎車州屬和什拉特莊地六千二百三十五畝零額徵本折糧一百五十一石零本折草一萬七千五百三十四斤零均著悉數蠲免葉城縣屬牙斯冬阿由渾等莊地一千三百五十九畝零額徵本色糧十石零草一千三百六十五斤折色糧十八石零草二千一百七十六斤零著一律蠲免以紓民力餘著照所議辦理○庚子 上御乾清宮賜廷臣筵宴○添派刑部尚書孫毓汶恭辦 萬壽慶典事務○癸卯 上詣 時應宮拈香○上詣 慈福端佑康頤昭豫莊誠壽恭欽獻皇太后前請安○以饒應祺爲甘肅新疆布政使○李鴻章奏北洋海軍鎮遠致遠等三艦四快船光緒十二三四五等年用款前經分案造具清冊奏咨請銷費經兵部行查各款當即飭據天津海防支應局司

道詳稱原送冊造致違等船洋員薪飯川資各款前奉部查業經詳晰登覆茲兵部復以續送合同內正管輪白羅們他耳等六名係構於十五年以前陸續遣撤病故究竟該洋員等月支薪飯銀若干遣撤時各給船位川資若干係於何年月遣撤合同內均未開列至所稱該洋員等川資銀兩係按照接帶致違等船來華准銷成案係於何年月日經本部准銷應一併聲覆等因查白羅們他耳等月支薪飯細數遣撤時應給頭等船費各節光緒十四年二月間業於配設致違等船員名薪餉並酌留洋員案內分晰開單奏咨立案該洋員等續留與否尙待期滿酌辦當初立合同之際其遣撤日期自屬無從預報迨十六年間續送合同所開均係現在當差及續屆之員白羅們他耳等早經遣撤病故應於銷冊內分別造報續送合同自未便列入當已隨冊聲明並非遺漏至該洋員等回國川資係按照光緒十六年二月間海軍衙門會同戶兵工部核覆致違等船來華用款准銷成案辦理又致靖經來四快船需用軍火等件共九百噸在滬起卸雇用駁船共支運費銀一百八兩有奇前經部查當以前項軍火各件繁重零星起駁入棧輾轉多次均由商棧包運祇能按噸估計不能以斤重號件程途里數強爲分算疊覆茲兵部咨令仍造細冊送部查前項軍火各件共九百噸合重一百五十餘萬斤由輪船駁入招商局棧房計程十餘里上海駁船極小雇價極昂每船至多不過裝七八十擔若照天津軍械局及南洋搬運軍火車船脚力



准銷成案每小駁船一隻給雇價銀八錢此一百五十餘萬斤卽須船二百隻合銀一百六十兩另須雇夫上下搬運等費尙不在內今由商棧包運僅用銀一百八兩有奇實係格外節省且天津軍械局搬運軍火支款向不分斤重里數歷經造報准銷有案應請照案准銷又大沽口運煤駁費及存棧貨物保險兩款前經部查業已詳晰登覆茲兵部復又行查刪減查上年登覆兵部駁查三十四兩年北洋防費銷案內大沽船塢運交各兵輪煤炭在大沽口沙外運交者原定每噸銀一兩六分嗣減爲八錢六分沙內運交者每噸銀七錢一分在大沽口內運交者每噸銀五錢均係雇用民船運送按照民價從減議定委辦絲毫再減存棧保險一款北洋由外洋購辦貨物到滬存棧隨時與行家議明如在一月以外兩月以內者仍援照輪船保險章程每價銀千兩給銀三兩若存棧未及一月按照每七日洋人一禮拜每價銀千兩給銀七錢五分核算有省無費由臣奏請照數准銷於十八年十二月二十四日奉到 硃批著照所請該部知道欽此欽遵在案此次鎮遠致遠等船支過運煤駁費及存棧貨物保險兩款與前案事同一律應請照數准銷等情具復前來臣查北洋創辦海軍鎮遠致遠等七船仰賴 醇賢親王主持肇費始底於成一切俸餉章程悉出 醇賢親王手定舉凡用款鉅細無不立有範圍奏奉 硃旨允准頒行恪遵辦理該七船每年應需餉項均領自海軍衙門由天津支應局代收代放遇有活支各款隨時彙

咨海軍衙門立案計該七船光緒十二三四五等年用款共應歸兵部核銷銀一百十八萬五千五百一兩有奇內經部查各款僅銀九千一百餘兩而此九千一百餘兩中運煤駁費存棧保險兩款業已於北洋防費案內奏明准銷洋員川資駁運軍火兩款亦皆有准銷成案可摺其餘請銷七船俸餉雜費洋員薪飯等項共銀一百十七萬六千四百餘兩均係遵照海軍章程照額應支之款徒以率於細故往復行查動煩文牘致歷屆全案久懸未結查戶部核撥光緒元年至六年洋員支款案內聲稱本部核銷各項總以例章奏案爲憑北洋所覆各節亦係實在情形應由該大臣自行奏明辦理等因歷將光緒十四年以前北洋海防銷案經部駁查各款逐一登覆奏請准銷奉 旨著照所請該部知道欽此該七船光緒十五年分采買軍火等項經費亦於十八年十二月間經工部核奏照數准銷且查定遠等三艦光緒十一年冬季薪糧公費銀四萬四千二百三十五兩有奇奏明歸入北洋防費案內勦支造報亦經兵部核奏照數准銷所有該七船光緒十二三四五等年在海軍衙門領款內支過俸餉雜費洋員薪飯川資駁費保險等款應歸兵部核銷銀一百十八萬五千五百一兩一分四釐四毫六絲三忽九微七纖本係照案接支核與從前准銷各案事同一律委係實用實報並無絲毫浮糜合無仰懇 天恩敕下兵部一併照數准銷以清案牘報聞○甲辰諭明年恭逢 慈禧端佑康頤昭豫莊誠壽恭欽獻皇太后六旬萬壽

所有應行來京祝嘏之蒙古王公台吉等其間有年班者著該班之王公台吉來京不該班之王公台吉等均著不必來京內扎薩克乾清門行走之王公台吉等有年班者著來京御前行走有情願來京者著來京叩賀○戊申諭軍機大臣等有人奏額臣辜恩負職據實糾參一摺據稱湖廣督臣張之洞自移督湖廣以來改辦鍊鐵並開煤礦各礦乞留鉅款輕信人言浪擲正供又復多方搜索借電竿毀通橋幾釀巨患督署被焚而不入告州縣補缺而勒派捐還臆妄行藩司王之春指克聚斂直隸州知州趙鳳昌聲名甚穢等語著劉坤一按照所參各節確切查明據實具奏原摺著摘鈔給與閱看將此諭令知之○己酉諭張聯桂奏養利等州縣民力竭蹶請將應徵地丁兵米分別蠲緩帶徵一摺廣西養利等州縣本年夏間雨水過多收成歉薄著將應徵地丁兵米照常徵收民力實有未逮加恩著照所請所有養利州應徵十八年錢糧銀兩著蠲免十分之五其餘五分歸入本年應徵崇善武宣兩縣應徵十八年錢糧銀兩著蠲免十分之三其餘七分歸入本年應徵臨桂靈川富川賀縣蒼梧五縣應徵十八年錢糧銀兩著各以八分歸入本年應徵其餘二分分限三年帶徵臨桂靈川蒼梧三縣原緩十七年錢糧著俟帶徵十七年錢糧限滿後接續帶徵其富川賀縣二縣錢糧著自十九年起分限三年帶徵崇善武宣二縣應徵十八年兵米著各蠲免十分之三其餘七分歸入本年應徵臨桂靈川富川三縣應徵十八年兵米著各以八

分歸入本年徵徵其餘二分分限三年帶徵臨桂靈川二縣原免十七年兵米著俟帶徵十七年兵米限滿後接續帶徵其富川縣兵米著自十九年起分限三年帶徵以上各州縣十七年錢糧銀米應歸十八年帶徵者並著展至十九年徵徵遞行推緩一年以紓民力餘著照所議辦理○庚戌以秦懷亮爲福建建寧鎮總兵○辛亥諭本日據總辦 萬壽慶典王大臣世鐸等會同禮部奏請加上 慈禧端佑康頤昭豫莊誠壽恭欽獻皇太后徽號以光鉅典朕欽奉 慈旨此次辦理慶典業經降旨悉照前章已命特開恩榜加惠士林茲據該王大臣等合詞奏請加上徽號皇帝恭遵 成憲竭誠籲請余若固卻轉似矯情卽著照所請欽此仰蒙 聖慈俯允朕心歡忭實深所有一切應行典禮著各該衙門敬謹預備○癸丑諭上年山西陽曲等州縣收成歉薄北路口外一帶被災尤重閭閻困苦情形殊堪憫惻現當青黃不接之時爲日方長必須寬爲接濟除諭令張煦妥籌賑撫外加恩著先由戶部撥銀十萬兩解往備賑卽著張煦督飭所屬詳察災區輕重核實散放一面將現辦情形迅速覆奏以慰廑懷○諭戶部奏遵議巴克坦布所交左翼監營盈餘銀兩一摺所交盈餘銀四千四百三十二兩著交廣儲司餘依議○諭戶部奏遵議立山所交右翼監營盈餘銀兩一摺所交盈餘銀二千十二兩著交廣儲司餘依議○諭軍機大臣等據內閣學士惲彥彬御史王儆奏山西災情甚重請飭籌賑運糧協賑賑捐各摺片上年山西

邊外七廳及大同等府被災較廣業由該省籌款賑撫現在青黃不接為日正長小民困苦情形實堪軫念本日明降諭旨由戶部撥銀十萬兩交張煦散放至采運糧石全在商販流通所有直隸山西兩省應收租糧盤稅著李鴻章張煦通飭各屬一律停收遇有糧運過境飭即妥為護送以廣招徠李鴻章於萬全等縣被災地方已派員賑撫該處與山西境地毗連並著該督籌撥賑款飭令派出之員就近在山西邊境協賑

二月甲寅朔以前任布政使王毓藻捐田贖族頒給匾額○丙辰以志銳為內閣學士○黃翼升奏奴才前在江甯省城恭報接受提篆即於九月二十二日由江甯起程先至安徽太平府清理奴才署中公事就近校閱提標五營隨即派江上艘以次校閱湖口鎮標五營漢陽鎮標四營岳州鎮標四營各營陣法尚屬整齊施放鎗礮亦尚嫻熟當將尤為出色者存記升拔生疏者分別責懲以資鼓勵而生觀感行經安慶武昌省城復繞鄱陽洞庭至南昌長沙省城面晤湖北湖南安徽江西各督撫臣商辦事宜計周迴四千餘里往返七十餘日已將本標五營及上江十三營一律閱竣尚有下江瓜州鎮標四營該各營甫經兩江督臣劉坤一於夏間出省校閱而奴才接篆後即日出巡尚有與督臣應行面商事宜因於十二月初九日寄抵江甯暫駐行館擬將商定公事趕行辦理開春即接閱瓜標四營以符定例竊維長江經

制水師經始於同治初年奴才始於同治三年四月間奉 旨補授是缺其時軍務甫定凡百草創親見前大學士兩江總督曾國藩前兵部尚書彭玉麟等訂立營制之苦心第原摺已稱將來尙須隨時損益誠以風氣有異則當量爲轉移或日久玩生又當力加振作而其關鍵全在實事求是破除情面奴才擇其切要者先爲申徹一曰禁陸居水師陸居本有厲禁從前戰士舍船隻外無可爲家嗣後積習日漸彫謝照章挑選附近習水之人接續充補人屬土著卽雖保不就便上岸該弁兵等或此去彼來或早去暮歸造端至微而平時之約束臨時之呼應皆將因此窒礙現經奴才通飭無論官弁兵丁凡有違章陸居者一體參革並嚴禁私派差使攪離汛地以重防務一曰戒嗜好水師軍處舟中易於沾染煙賭此二事多在暮夜而盜賊之伺隙亦恆在暮夜從前奴才定設四板船隻夜間各就本汛放哨巡更近聞作輟相參因之行船時有失事查煙賭二事水師禁約極嚴現經奴才申明舊禁有犯必懲其放哨巡更則以晚間有無失事考其出力與否以定賞罰一曰勤操練營伍貴在習勞臨陣尤當人械相習方爲可恃查水師營制凡考充餉糧糧皆有一定程式立法本屬周密惟該管將領若不隨時訓練追巡閱屆期其劣者雖立予資革而前次已屬虛糜糧餉且應操之與臨陣心膽之壯怯慳患之緩急則又有間矣奴才現令按時操練務須精益求精庶臨時耳目手足無不如意之所欲赴一曰屏虛文查水師入手得力全在

勦機二字卽改爲經制以後亦令將虛文一概從略近來各營駐紮日久與地方官時有交涉公事雖尙無講究酬應之弊然亦有致飾於外漸忘本來者矣夫武人之練技如學人之窮經必先屏絕紛華乃能一其心志奴才嚴飭弁兵等各務本職但視差事之勤惰技藝之精疏以定黜陟其稍涉浮滑粉飾者嚴加戒飭務令檢改總不使蹈緣營陋習致失湘勇之舊規惟奴才所尤在念者則以面奉 諭旨嚴防會匪一事查外間所稱哥老會多係游勇相率爲匪辦法務在逐漸解散絕其萌芽方不釀成事端沿江一帶伏莽上年經督撫臣先事發覺辦理迅速始獲無事然事後仍不可稍涉大意業經奴才通飭各營無論生熟人等如果混跡來營設詞煽惑卽當據實稟請嚴拿辦其有從前誤被誘惑者但呈繳稟布許其不追既往若仍執迷不悟一經查出照章送交該地方官按律嚴辦奴才接見各營弁兵諄諄面戒仍督飭各該管將領明查暗訪總期設法杜絕到處防範不令與營中勾結爲奸藉副 朝廷整飭營伍之至意報聞○丁巳祭 先師孔子廟遣徐桐行禮○戊午祭 社 稷壇 上親詣行禮○諭上年直隸安州等州縣災區被災較重迭經撥銀米蠲緩糧租開辦賑捐分別接濟惟念現距麥秋尙早小民生計維艱允宜再沛恩施俾資春撫著於本年江蘇海運到津漕米內截留五萬石由李鴻章詳查應賑戶口核實散放並著以工代賑其隨漕輕糶等項及粥價運費經撥耗辦米石並著分解賑局應用該督務

當嚴飭所屬認真撫恤毋任官吏稍有弊混用副朝廷軫念民艱有加無已至意○諭本日福銀對引錯  
誤著交部議處○諭劉坤一奎俊奏查明江淮等屬被旱被水並拋荒田地懇請蠲緩漕糧開單呈覽一  
摺江蘇江甯淮安揚州等府屬上年春夏間高田被旱低窪之區被水淹浸徐州府海州等屬又因山水  
下注田禾被淹收成均形歉薄已降旨將應徵錢糧分別蠲緩若將應徵漕糧照常徵收民力仍有未逮  
加恩著照所請所有甘泉縣成災田地應徵光緒十八年漕糧照例按分蠲免蠲賑及勘不成災暨毗連  
災區例准並緩之成熟田地同上元江甯句容江浦六合等五縣已報成熟復被歉收田地並山陽阜甯  
清河桃源鹽城高郵泰州東臺江都儀徵興化寶應銅山浦縣蕭縣碭山邳州沭陽贛榆如皋等二十四  
州縣田地應徵光緒十八年漕糧及改徵折色銀兩均著緩至十九年秋成後分作二年帶徵又上元江  
甯句容江浦六合五縣未報荒田同江都縣揚州衛營壘廢坍荒民田除報熟徵外其餘坍荒田地  
應徵漕糧米石均著蠲免以舒民力餘著照所議辦理○己未諭德馨奏任滿籲懇陛見一摺德馨著來  
京陛見江西巡撫著方汝翼暫行護理○諭殺虎監督恩浩奏差滿回京彌父盈餘銀兩一摺所得盈餘  
等項銀一萬六千六十二兩零均交廣儲司恩浩著毋庸賞給該衙門知道○壬戌兵部右侍郎沈源深  
因病奏請開缺允之○甲子調徐樹銘爲兵部右侍郎以徐曾瀝爲工部右侍郎○乙丑唐炯奏東川昭



通兩府向來民間駄馬上下駄運商貨不過四千餘萬自光緒八年京銅改歸故道由威寧昭通兩路分運至鹽交收昭通一路每年運銅不過二十餘萬計運銅百斤每站例給腳銀一錢二分九釐二毫而商貨則給二錢有零雖多寡懸殊然每年銅運止有此數又有鹽井渡回頭商貨津貼故雇募尚不爲難近年昭通一路銅增至八九十萬已覺馬少銅多兼之鹽井渡商貨以湖廣布疋爲大宗近因廣布滯銷商貨不行市面蕭索加以東昭運歲徵收每斗包穀需錢一千四百文斗米需錢一千八百文例給腳銀不敷喂養又無商貨津貼所有馬腳散走川黔就地覓食其不能他往尙在駄運京銅約止六七百匹以致十二起二批京銅沿途堆積將四十萬而十三起頭批京銅陸續出順又二十萬若不另籌辦法愈積愈多深恐有誤京運現擬仿照貴州威寧運銷舊章自東川府至鹽井渡委員查勘情形設立短鋪雇用民夫節遞轉搬既可濟駄馬之不足兼可養活無數窮民惟自東川府至鹽井渡悉是崇山峻嶺道路崎嶇每天只能搬運五十斤不能搭運又現在年荒米貴不能不寬給工資以免枵腹一切係屬創辦能否較馬運節省抑須略有加增應俟試辦數月諸凡就緒再行擬定章程奏明立案永遠遵行下戶部知之○丙寅諭軍機大臣等有人奏訪聞直隸順大所屬之文安大城以及任雄霸保六州縣歷被水患農田盡成澤國上年六七月間文安紳民黃元馨等呈請照舊制修築閘千里隄大衝各莊舊有水壩一道兩洞

均可洩水由大清河順流歸海直隸總督順天府尹批示嘉獎尙未興修等語所奏是否屬實該處蘆有堤壩應否興修著李鴻章孫家鼐孫楫確切查明據實具奏○丁卯祭 歷代帝王廟遣斌行禮○戊辰 上御承光殿德慶使臣巴圖魯覲見○崧駿奏浙東鹽務自同治九年爲始由票運改爲整綱各地額引本係加成認運歷今二十餘年暢滯不一內惟夥休歇常廣開六地逐年結銷積引頗重祇以國課有關節經費運司實力追繳現雖課款尙無墜誤而鹽引愈積愈多商情賠累資本實難周轉前據綱商蘇肇唐等呈請設法疏通批據兩浙鹽運使惠年查明詳稱遵經飭據紹興府鹽局甯紹分司確查夥休歇常廣開六地自改綱起至本年六月止除存棧未售者不計外實積二十三萬五千一百四十八引二分商情困苦請援照山東成案自癸巳綱爲始將該六地額引十三萬三千餘道額徵正課銀二十三萬四千餘兩以八成作正年清年款二成作餘儘銷儘報俟積引稍疏再行復舊等情詳請具奏前來伏查浙東各地兵燹以後向辦票運嗣經升任撫臣李瀚章奏請改運綱鹽卷查原案本有試辦數年察看商力情形再請定制之語現既查明該六地停積未銷之鹽實有二十三萬五千一百餘引之多若仍拘牽從事不爲量予設法不特商人賠繳正課力難支持且恐陳陳相因鹽務益將敗壞近年以來承辦商人革退類仍而該運司尤覺追呼計竭是非變通舊章不足以資疏銷恭閱邸鈔山東省前因引積商

因奏請運八餘二奉 旨允准在案該大地鹽務情形與東省究有不同其為商情困累大率相似合無  
仰懇 天恩俯准將浙東夥休歇常廣開大地援照山東成案自癸巳綱為始將額引以八成作正年清  
年歇二成作餘儘銷儘報俟稍引稍疏再請復舊以紓商力下戶部議奏○庚午 上詣 關帝廟拈香  
○諭軍機大臣等克蒙額等奏歸綏地方上年荒歉兵食缺乏請撥款買米以濟軍困一摺著張煦速籌  
的款發交該糧餉同知採買米石接濟兵食毋任缺乏克蒙額等原摺著鈔給張煦閱看○世鐸等奏上  
年十二月初二日禮部遵 旨詳查 萬壽慶典成案繕單具奏內開乾隆二十六年 皇太后七旬聖  
壽自暢春園安輿還宮等語恭查會典是年十一月己酉 高宗純皇帝奉 皇太后乘大安輦自暢春  
園還宮 高宗純皇帝御龍袍衰服乘騎前導又乾隆二十六年 皇太后七旬萬壽 高宗純皇帝親  
撰連珠詞製團屏恭獻三十六年 皇太后八旬萬壽奉上 徽號 奏書 表文均 御製並 撰進  
鴻禧慶頌八章又乾隆二十六年 皇太后七旬萬壽恭上 徽號禮成 高宗純皇帝詣 慈寧宮侍  
宴綠衣躬舞奏觴上 壽三十六年 皇太后八旬萬壽 高宗純皇帝詣 慈寧宮侍宴綠衣躬舞奏  
觴上 壽各等語明歲恭逢 慈寧端佑康頤昭豫莊誠壽恭欽獻皇太后六旬萬壽 皇上率天下臣  
民臚歡祝 嘏所有應行典禮自應次第舉行等詳稽成案如 皇上御綵衣進舞暨 御製詞章均

候 旨遵行外惟 皇太后自頤和園還宮 金輦由何處乘御及 踰路經由之處相應請 旨飭下

各該衙門先期敬謹豫備以昭慎重 上諭據總辦 萬壽慶典王大臣世鐸等會同禮部奏稱明歲

皇太后六旬萬壽自頤和園還宮金輦由何處乘御及踰路經由之處請旨遵行一摺朕欽奉 慈禧端

佑康頤昭豫莊誠壽恭欽獻皇太后懿旨還宮日由頤和園東宮外彩殿乘輦經由石路至倚虹堂少座

進西直門地安門至西華門內咸安門外彩殿降輦乘輪還宮皇帝於是日由東宮門外率王公百官跪

送扶排金輦至牌樓乘駒遵引至右路乘轎先行在西華門內跪迎王公百官在西華門外跪迎欽此所

有應辦一切事宜著該衙門先期敬謹預備以昭慎重○辛未 上詣 奉先殿 壽皇殿行禮○諭本

年輪應行閱福建浙江廣東廣西四省營伍之期福建即派譚鍾麟浙江即派崧駿廣東即派李瀚章廣

西即派張聯桂逐一查閱認真簡校如有訓練不精軍實不齊者即將廢弛之將弁據實參奏毋得視為

具文○丙子祭 先農壇 上親詣行禮○丁丑諭張煦奏已故知縣虧短交代請旨查抄等語已故

西甯鄉縣知縣曹憲虧短交代銀兩勒限完繳仍未解清實屬玩延即著張煦提集該家屬丁書人等嚴

訊是便是挪照例懲辦並將該故員任所寓所資財嚴密查抄其原籍家產即著順天府府尹一併查封

備抵以重庫款○前山東巡撫陳士杰卒賜卹如例○己卯諭前據總辦 萬壽慶典王大臣世鐸等會

同內務府奏稱恭查乾隆年間歷次慶典自西華門至西直門將兩旁街道鋪面量加修葺並搭蓋經城戲臺分段點設景物各在案明歲恭逢 皇太后六旬萬壽可否照案辦理請旨遵行一摺朕謹據成案竭誠籲懇欽奉 慈禧端佑康頤昭豫莊誠壽恭欽獻皇太后懿旨西直門外關廟一帶及城內踴路所經著不治潔淨兩旁鋪面房間稍加修葺至點設景物等項著相度地勢酌量辦理不得踵事增華致滋糜費欽此朕欽悅實深即著該王大臣等將一切應辦事宜敬謹妥議具奏○是月德意志國使臣巴蘭德回國參贊師特恩博署理○義大利國使臣潘薩回國參贊噶察納署理

三月甲申諭張家口監督溥頤奏差滿回京撥交盈餘銀兩並請減成賠繳虧短盈餘銀兩一摺所得盈餘銀五千九十兩等著交廣儲司其所請減成賠繳之處著戶部核實具奏○李鴻章奏永定河北上汛一號至八號現擬接造石堤計長八里連添修土格共估需銀五十四萬四千八百餘兩請由部分年撥款興辦經 旨於光緒十八年十月奏奉 旨敕部籌議嗣經工部會同戶部議准照辦請由直隸選派大員督率經理務於三年內一律完工本年先指定河南省及揚州鳳陽兩關協款銀十九萬兩餘俟籌有定欸分年指撥薪賞等項需銀三萬兩由直隸自行湊撥專案報部備核等因具奏奉 旨依議欽此鈔奏咨會前來 臣查永定河北上汛接造石堤屏蔽 京師關繫下游民生利害亟宜及時舉辦惟工作極

艱需費甚鉅每年除伏秋大汛及凍結期內只有五六箇月做工時日又甚促迫業將一切情形於前奏  
詳細陳明現在興辦大工尤須得人經理臬司周馥歷辦河堤各工最稱諳練且係原勘估定之員應即  
派令督辦候補道張蓮芬上年會辦永定河合龍大工深協機宜候補道寶廷繫久任永定河總局情形  
熟悉應派該兩員及永定河道萬培因會同辦理該臬司衙門應辦公事甚多於開工後先行回省遇有  
緊要事件隨時臧商仍抽暇赴工督催察看責成張蓮芬常川駐工與寶廷聯萬培因督率印委各員遵  
辦茲據該司道等稟報業於二月十五日開工查此項工程以採運料物爲大宗應於冬令農閒車賤之  
時預爲儲備原估係照極廉之價撥節核計春融後農事方長運腳加增先飭該司道等派員採買價值  
提前分投採運現計到工片石已有二千餘方石灰已有一千萬斤可供數月之用趁此日作晴暖就已  
到之料及時興作惟蘆溝橋左近匠工價昂一時尙難多雇臣已調派熟悉工作之威寧哨勇前往幫同  
趕做以免稽遲至挑土人夫即用近河被水貧民以工代賑實爲兩便工部原奏令將工程劃分段落並  
將一年修竣之工撥照從前畿輔水利成案節次造冊題銷查從前興舉各工河堤橋閘疏築並舉彙估  
分辦故可逐年造報今估建之石堤八里只是一段工程首尾相連必須通盤籌畫節節向前趕做未便  
據分段落每屆年底工段有已成未成及甫經開工者料物有已到未到及訂購未運者支用欸項須按

工料酌量發給前後奉算礙難按年截報應俟三年工竣後彙齊造銷以歸簡便而昭核實現派購料監工各員均係熟手妥實可靠臣仍飭該司道等隨時認真督察毋稍草率浮冒致干參賠目前開工立待用款飭由司局先行設法籌墊藉應急需俟各省關撥款解到歸還此後但須款項應手得以多儲物料尅期接做三年之內定可造成其薪資雜用銀兩卽由籌賑局分年籌撥事竣一併報銷下工部知之○  
乙酉 上幸養疴齋閱侍衛射○丙戌諭軍機大臣等前因山西被災較重發部庫銀十萬兩賑濟旌據張煦覆奏冬春賑撫及籌款購糧情形該省已發銀二十五萬兩米數萬石現在春麥可種民情安謐等語嗣復據徐桐等奏捐米二萬石李鴻章奏天津續捐銀十餘萬兩總計賑款銀米爲數已爲不少茲復據御史林紹年奏請撥湖廣折漕銀兩解往散放一摺直隸與山西壤地毗連見聞較確現在該處賑情形若何是否尙須接濟著李鴻章迅速確查覆奏至湖廣折漕銀兩現在已否購米運津並著查明具奏林紹年原摺著鈔給閱看將此諭令知之○諭裕祿等奏查勘大政殿應修工程請擇期興修一摺著欽天監於本年四月內選擇吉期先行知照卽著裕祿鳳秀屆期會同敬謹興修餘著照所議辦理○  
戊子 上幸頤和園詣 慈禧端佑康頤昭豫莊誠壽恭欽獻皇太后前請安○還宮○己丑予故布政使王德榜照例議卹戰績交國史館立傳○庚寅以嵩崑爲貴州布政使○轉吳講爲翰林院侍讀學士

以李鴻藻爲翰林院侍講學士○辛卯以員鳳林爲安徽按察使○諭軍機大臣等前因山西被災較重  
實發部庫銀十萬兩賑濟前據張煦奏冬春賑撫及籌款購糧情形該省已發銀二十五萬兩米數萬  
石嗣復據徐桐等奏捐米二萬石李鴻章奏陸續籌捐銀二十餘萬兩總計各項銀米源源解往諒可稍  
資接濟惟聞該處災民眾多嗷嗷待哺爲日方長殊深軫念加恩著將湖南湖北本年應解正耗漕米六  
萬五千餘石迅速核實變價同水腳運費等款一併核扣徑解天津交李鴻章發交辦賑各員確查災區  
安速散放毋得稍有弊混用副軫念民艱有加無已至意該部知道○福潤奏准部咨山東省鹽務每年  
南北運缺銷甚多亟宜整頓將現行引票按年照額全銷並設法帶銷積欠妥議章程奏明辦理等因光  
緒十八年十二月十四日具奏奉 旨依議欽此欽遵咨行到東當經轉飭遵照去後茲據鹽運使李希  
運會同南北運總辦提調各員悉心妥議請將光緒十五年商撫臣張曜奏准商運額崇二成作餘一案  
俟來年限滿後規復舊制毋庸再減至官商應銷額引酌擬整頓章程詳請核奏前來奴才查南運商邱  
北運濮州等州縣當道光年間物力全盛之時銷數卽難足額迨後水災匪擾竟致引積課懸前撫臣丁  
寶楨委員設局試辦竭力維持至今二十餘年課運雖無貽誤總未能照額全銷緣南運距場甚遠本重  
價昂而地方非鄰淮北卽近蘆岸小民貪賤食私禁不勝禁北運則半屬沿河連年黃水爲災民情困苦



銷鹽異常短絀其餘官辦州縣或地近場廩或水旱頓仍情形雖各不同要皆商乏引懸疏銷無術不得已而囑官經理是以歷年短銷之引局辦居其半官辦十之四商欠者僅十之一二誠以地勢使然非敢置課額於不顧也茲奉部飭令整頓現引帶完積欠實爲正本清源之計夫多銷乃能裕課定法貴於因時山東鹽務章程幾次釐訂業已詳明周密該司於無可設法之中祇將二成餘票限滿規復舊制並力籌辦法四端一奏銷宜依限辦理也查鹽務首重緝私而緝私貴在牧令如不認真查拿銷數何能暢旺各州縣迴護處分軍興以後有遲至七八年始行造報者近亦延擱一二年及至彙辦該州已物換星移怕者無所儆賢者亦無所勉應卽申明定例勒令依限造報嚴核分數將督銷不力之員立予處分全完者照章議敘局辦委員並以銷數多寡定其功過庶各知所勸懲疏銷可期得力一巡務宜整飭也每歲南河北上往往夾帶淮鹽回空則帶蘆鹽兼之各州縣地多斥鹵小民搗土煎熬隨處灑鹽在在皆足爲害前擬於德州柘園鎮地方設卡稽查並於海豐陽信沾化銅山宿州渦陽等處增設巡勇以防浸灌民間私設鍋池賣成州縣隨時訪查平毀有犯必懲不准玩泄一體恤商艱艱顧正供也東綱商碎戶散資本微薄自運自銷者不過十分之三餘則總商領引春商告運撥商銷鹽竭蹶從事每致敲捕比追仍多領不足數現在禹城平原館陶等處卽因招徠無人飭地方官代爲經理或減款先顧正供各立年限引

背仍留商名冀其徐圖恢復惟商艱難宜體恤仍應力顧正課無論官商以後應賣成按額領銷不准短欠一裁革浮費平價利運也永阜場鹽池被黃流頂托涵氣不升產鹽短絀續價增昂商人成本既重運鹽至東阿縣南橋齊州安居等處逆流上挽千餘里腳費尤復不資船戶人等往往沿途盜賣茲據擬嚴禁鹽戶攤派一切浮費以平價價並設河巡分段稽查防船戶挖包盜賣之弊以上各節均為目前緊要關鍵奴才當督飭運司認真經理如有未盡事宜仍隨時分別籌辦總期多銷一分鹽引即多裕一分課款以仰副 聖主整飭鹽綱之至意下戶部知之○戊戌以許景澄為內閣學士○以黃毓恩為福建布政使趙舒翹為浙江按察使○己亥 上幸頤和園詣 慈福端佑康頤昭豫莊誠壽恭欽獻皇太后前請安○還宮○以李占椿為安徽皖南鎮總兵○諭李鴻章奏已故知州虧短交代銀兩請旨查抄等語已故直隸署晉州知州宋彭壽虧短地丁錢糧等款銀兩業經革職勒限追繳仍未完解實屬玩延卽著李鴻章提集該家屬丁書人等嚴訊是便是挪照例懲辦並將該故員任所寓所資財嚴密查抄其原籍家產卽著江蘇巡撫一併查抄肅抵以重庫款○壬寅劉坤一奏兩淮引鹽行銷六省課額繁重損益因時康熙三十二年纂修兩淮鹽法志以資攷證再修於雍正六年復修於乾隆十三年自嘉慶十一年四次續修迄今已歷八十餘載其間張弛因革之端有關遵守者不可枚舉軍興而後案多散佚歲月愈久

採輯愈難經前督臣曾國荃於光緒十五年十一月籌捐經費設局重修派委前山西冀寧道王安總司編校臣蒞任後飭令該道王安始終其事會於十八年二月附片奏明在案現在纂輯成書辦理完竣通分十門子目九十有九共計一百六十卷繕寫黃冊進呈並另繕副本照例咨送戶部備查據江甯藩司瑞璋兩淮運司江人鏡江蘇補用道前山西冀寧道王安詳請具奏前來臣謹將繕就黃冊派委員弁齎京恭呈御覽再上兩屆纂修一係撫臣撰序一係臣衙門撰序此次應否仍由臣衙門或由江蘇撫臣撰序恭候欽定得旨著戶部詳細覆勘具奏○癸卯諭軍機大臣等熱河剿平股匪後伏莽仍未淨盡深虞乘間竊發並分竄秦天吉林等處滋蔓難圖著裕祿長順督飭營汛地方各官實力巡防認真搜剿務當合力兜拿有犯必懲○乙巳上謂奉先殿壽皇殿行禮○戊申轉恩蔭為翰林院侍讀學士以壽耆為翰林院侍講學士○己酉上幸頤和園詣慈福端佑康頤昭豫莊誠壽恭欽獻皇太后前請安○還宮○壬子以張其光為福建澎湖鎮總兵○諭軍機大臣等福建邵武府知府董毓琦福寧府知府嚴良勳著譚鍾麟悉心察看如竟不能勝任卽行據實參奏毋稍遷就將此諭令知之

夏四月癸丑朔時享太廟上親詣行禮○以張永清為甘肅涼州鎮總兵○乙卯常壽大祀天於

圖臣 上親詣行禮○上幸頤和園詣 慈寧端佑康頤昭豫莊誠壽恭欽獻皇太后前請安○還宮

○譚鍾麟奏福建浙江同處海濱水程往來一千數百里兩地商民懋遷有無率取道海上以販運米糧木植爲大宗船笨載重須俟風放洋隨潮上下駕駛既不靈捷往返勢難剋期操此業者不獨患波濤之險惡更慮盜賊之覬覦上年冬月臣鍾麟開海道不靖派閩省伏波琛航靖遠三兵輪駛赴浙洋會同浙省元凱超武兩輪船更番巡閱與沿海各營水師礮船聯條緝捕咨商臣崧駿督飭水師將弁實力巡緝嚴加整頓去臘今春節經各師船拿獲擊斃盜匪數起洋面漸爲安謐然浙江沿海地方大小口岸數十處島嶼叢雜汶港紛歧設師船自裁減後所留不過五十餘號福建外洋師船馬尾之役擊沈破壞僅存艇船二十九艘兩省千數百里中祇此八十號師船梭巡洋面兼防內港實屬不敷而商船連櫓銜尾日夜行駛萬不能逐起護送守候稽遲臣鍾麟函致浙江提臣馮南斌擬在甯波口雇募紅單船數號酌撥弁勇專爲護送商船以補師船之不足所需薪糧由兩省分籌接濟現准提臣馮南斌咨稱擬雇募紅單及扮高船八號歲需經費銀二萬三千有奇臣等伏念兩省庫款支絀大致相同何敢以艱窘之資爲無益之舉惟審度目前情形護商之船實不可少查兩省抽收釐捐皆有船捐一欸歸釐局造報而閩省直銷之護商經費故商人屢以保護商船爲請但使洋面肅清則貨船多而釐捐亦旺是此項師

船可以緝盜可以護商而於盜務亦不無小補仰懇 天恩俯准添設護商船八艘所需經費二萬三千餘兩由兩省督局動撥作正開銷再現值魚汛兩省出洋漁船不下數萬艘沿海師船全出梭巡尙難周密業由臣等駁暫挪撥捐二千兩解交提臣馮南斌於寧波口先雇紅單船兩艘委弁營衛護商船以期妥速得 旨如所請行○戊午諭裕祿等奏查勘 永陵明堂前泊岸本年宜修工段請擇吉興修一摺著欽天監於本年五月內選擇吉期先行知照即著盛京將軍會同工部侍郎敬謹興修餘著照所議辦理○己未 上幸頤和園詣 慈禧端佑康頤昭豫莊誠壽恭欽獻崇熙皇太后前請安○還宮○癸亥以李維述爲雲南鶴麗鎮總兵○乙丑王文韶譚鈞培奏開化府屬歸仁里地方界連滇越游匪時來窺伺意圖佔踞節經嚴飭各防營相機堵剿毋任闖入界內上年冬臘月間迭據管帶綏遠營補用知府前龍陵同知覃克振先後稟報該里黃樹皮一帶游匪大肆猖獗匪首夏桂安匪目黃原養等嘯聚千餘人滋擾聚仁番武兩甲地方於十一月二十八日黎明襲破老寨復進攻猛崗經覃克振委派都司袁用和等帶兵馳往剿辦於二十九日圍攻老寨鎗斃游匪五名三十日匪衆潰圍衝突我軍乘勢追剿至上下陽坡斃匪六十餘名奪獲馬匹軍械多件該匪竄入新寨十二月初二日官軍四面圍攻該匪出寨迎敵陣斬賊目黃原養并匪黨二十餘名匪等仍退入寨內初六初七初八等日迭次進攻斃斃游匪五十餘名匪

首夏桂安身受重傷率其死黨由羊坡坤老敗竄我軍乘勝追擊沿途斬殺匪黨二十餘名該匪等卽竄歸坤老寨等處初十一等日攻克坤老大塘等寨十二十三等日攻克南菁漫美漫幫等處該匪勢窮力竭不戰而逃悉竄回黃樹皮一帶先後傷斃勇丁十五名適署開化府知府馬世麟抽調忠字前營參將馬遇龍帶隊到營經單克振飭令都司郭先陽等會合攻剿於十五日先將五柯樹熱水塘漫瓜等處攻克斃匪二十餘名匪眾敗歸黃樹皮深匿不出我軍合力圍剿十八日該匪傾巢出撲鎗斃齊施我軍接仗陣亡勇丁二十餘名帶傷三十餘名十九日夜復整隊進攻該匪等仍大股迎拒我軍設伏奮力抄殺斃匪一百餘名該匪驚潰奔竄墜崖落河死者無數餘匪逃回越南當將黃樹皮收復歸仁里一律肅清並探聞匪首夏桂安已因傷斃命請將出力員弁擇尤請獎各等情當經批據雲南督後局會同布按兩司核明詳請會奏前來臣等覆查此次匪首夏桂安黃原襄等膽敢聚集悍黨千餘乘我軍換防之時突入險要分踞村寨搶掠焚殺慘不忍言單克振甫經到防猝逢劇寇卒能激勵將士分路馳剿兩旬之間攻克要隘十餘處鎗斃游匪數百名並將匪首夏桂安黃原襄等先後陣斬殲斃地方一律肅清辦理頗爲迅速所有在事出力文武員弁自應擇尤請獎以勵將來謹酌保武職十二員文職六員另繕清單恭呈 御覽得 旨單克振著賞給謀勇巴圖魯名號餘著照所請獎勵該部知道單併發○丁卯諭單

機大臣等王廷相奏山西朔州一帶災情甚重京津義賑由大同鹽鎮前往七廳散放通南口內各屬恐難兼濟懇恩撥帑賑撫等語山西北路各災區疊經撥發銀米賑濟卽著張煦斟酌情形均勻散放總期實惠普沾勿任災黎失所用慰朝廷懷系王廷相原片著鈔給閱看○諭由進士出身之滿漢侍郎內閣學士三品京堂及四五品京堂內未與考試試差者俱著於本月二十八日在上書房考試其不願赴考者聽仍向禮部聲明於開列考官本內扣除○戊辰諭前據大理寺卿徐致祥奏湖廣總督張之洞辜恩負職當諭令劉坤一李瀚章確查具奏茲據該督等先後查明覆奏張之洞在兩廣總督任內並無懶見優屬用人不公興居無節苛罰濫用等情現在湖北辦理鍊鐵開礦尙無浪擲經費情事其餘各條均係傳聞之誤湖北布政使王之春亦無指克聚斂實據張之洞王之春均著毋庸置議候補直隸州知州趙鳳昌不恤人言罔知自愛著卽革職勒令回籍以肅官方張之洞向來辦事尙屬認真嗣後於應辦事宜務當督率屬員力求撙節妥爲經理用副委任○己巳諭譚鍾麟奏革員虧短鉅款逃匿無蹤請飭拿辦一摺福建已革前署建陽縣知縣李聯琦虧短交代銀兩甚鉅追經拿問監追又復潛逃無蹤實屬藐玩卽著江西及各直省督撫一體飭屬將該革員飭拿務獲解往福建嚴追訊辦以重庫款○庚午張之洞譚繼洵奏足民之政農桑並重湖北向稱澤國農民終歲勤勩田疇所入爲利甚微一遇偏災立形匱乏

欲爲代謀生業廣闢利源酌土地之宜籌經久之策計惟有興辦蠶桑廣以阜物豐財補農功所不逮者之萬貢荊州厥績編組近時江陵天門穀城各有緞絹黃州沔陽當陽南漳等處亦各有絲特以樹藝飼養之法不逮浙人多自設於絲劣利薄臣等體察情形非極力振興無以廣風氣而濬利源始以十六年會檄司道籌款設局辦理屢經派員前赴浙江購運桑苗分發各州縣栽植並採購桑子交江夏漢陽二縣開地播種成苗飭令各州縣來省請領由臣等輯刊蠶桑簡編詳列栽桑養蠶摘繭繰絲諸成法一併散給轉發士民如法領植不許取民一錢輿情均甚樂趨自十六年起共發過各屬桑苗已及一千萬株據報成活分數有十之六七者有十之八九者亦有全數成活者現計初發桑苗已閱三年應飭各州縣及時教民蠶織茲據司局會同議詳復委員赴浙江採買接本桑株暨應用器具並招募匠師來鄂以浙法訓授本省子弟爲各屬倡導其甫經創辦之偏僻地方如絲繭並難銷售暫令州縣墊價收買解省織綢俾農戶見利勇爲其藝藝價值仍由省局撥還至絲繭暢銷之處卽毋庸由州縣收買如此因勢利導免致觀望遲疑以期推行益廣臣繼洵曩者備員隴右數往返陝岐間竊怪風詩所詠物產獨堪寶獨蓄而蠶桑之利無聞焉豈果今古異宜殆亦因循坐廢因於甘肅司道任內督民芟荆桑而樹桑現在秦州等屬桑株成林以彼寒瘠地方尙不無薄效湖北本沃壤宜桑之地但得州縣官實心實力隨時倡導不



至作輟相仍未有爲其事而無其功者擬飭司道會議勸懲情獎罰章程務求可以持久以仰副朝廷利用厚生之至意下戶部知之○壬申命岡勒銘額克塔爾巴哈賽著贊大臣保年充錫伯營領隊大臣以錫克爲伊犁副都統○副都統額爾慶額卒照軍營立功病故例賜卹職績交國史館立傳○還命薛福成致賀英皇次孫之婚○甲戌 上幸頤和園詣 慈禧端佑康頤昭豫莊誠壽恭欽獻崇熙太后再請安○還宮○乙亥以都右宿爲雲南鶴麗鎮總兵○王文韶奏貴州普安直隸州地連滇界山多徑雜最易藏奸本年二月間 臣等據署普安直隸同知候補知府戴斐章稟報有外來匪人劉燕飛糾約當年逆回保老四等在驢屬土城將順營得勝營及接壤之白寨各地方造言惑衆民苗多有信從並自立僞號派授僞職諸多狂悖等情當經 臣等批飭該管文武暨駐驛分統練軍劉仕旺嚴密查拿在案旋據戴斐章飭南星團首劉雲漢協辦姜奎獲僞軍師陳源青僧人惠明二名訊稱劉燕飛分布徒黨四路糾扇聚集數千人果有設爲不軌情事先是戴斐章稟明約定親赴黔滇交界各州縣適中之地會哨藉商協拿事宜詎劉逆知事已洩於三月二十六日糾集匪衆在南里打峯巖豎旗起事傳說二十八日攻城以致居民驚懼時劉仕旺布置戰守以樞城操練無多就近抽調分防練軍營管帶曾光勝會同幫帶都司徐炳文哨官李定坤帶練前往水塘一帶堵剿戴斐章會哨回至中途聞警兼程回驛該文武飛

報滇黔兩省發兵又以羅城距兩省會均有十站上下路程兼之山路崎嶇誠恐緩不濟急遂飛請四鄉團勇並商派教諭李燕頤照磨王國恩募勇守城仍馳赴打峯巖督剿行至水塘天已昏黑與賊相隔一山二十七日天微明由打峯巖直下鎗礮連施我軍與之對敵徐炳文奮勇殺斃悍賊三名奪獲藍旗一桿馬一匹賊少却官兵跟蹤緊追至趙官屯賊勢甚衆曾光勝徐炳文揮兵直進賊將不支突於山林內伏賊搥石打傷徐炳文墜馬賊衆回撲徐炳文猶手刃數賊旋右脇中矛陣亡練勇同死者二十餘名聞有另股抄襲羅城戴斐章將隊回城守禦賊亦進紮板橋屯離城十里二十八日天明賊分四路來撲我軍四路迎敵陣斬悍賊多名我軍亦有傷亡戊刻收隊是夜賊於城外放火由西門後山樓梯攀城經曾光勝李燕頤督勇力禦殺斃扒城賊十餘名五鼓賊始退二十九日西山一路之賊退至望城坡東南門一帶賊進攻愈緊圍首柳家修照磨王國恩合隊攻擊自已至午賊殊死戰午後圍首龍應門等分路帶團來援賊見援兵齊至始駭竄我軍追殺陣斬賊目楊科二譚苗子等數名匪黨三百餘名生擒一百三十四名奪獲旗幟馬匹刀矛多件城圍遂解餘賊潰逃此曹安驥妖匪起事攻撲羅城旋即擊退之實在情形也臣等先於三月三十及四月初三初四等日接報彼此電知滇省已派管帶綏靖中右兩營練軍遊擊黃呈祥尹光祥黔省已派管帶本標左營練軍參將潘輔漢各率所部晝夜往援又經提臣羅孝連

安義鎮臣將宗漢分派營官譚盛高馬主邦各帶練軍馳往知照前來查該匪等黨羽雖多幸逆謀發覺  
尙早火器不齊是以危城尙得保全惟首逆在逃餘匪未靖誠恐分竄糾擾滋蔓難圖現以日計所派各  
營應已先後抵境臣等仍嚴飭各將領偵探賊蹤所在盡力剿洗殲厥渠魁並札飭連界各地方文武於  
各處要隘分別堵截仍懸賞弋獲首要出示解散從務期絕淨根株仰紆宸系得旨卽著嚴拿匪  
首劉燕飛等務獲懲辦並將餘匪搜捕淨盡毋任漏網○內子以京師多雨上詣大高殿祈雨○戊  
寅諭載遷等奏司員修工不實同官稟控供詞狡展請交部嚴訊並自請議處一摺工部員外郎倭勇德  
派經修理諸梁紅橋等工現據工部郎中奎恆等稟控修理不實等情經載遷等詳加研鞫各該員供詞  
均屬支離狡展案關修理要工亟應澈底根究工部員外郎倭勇德工部郎中奎恆員外郎榮顯常清主  
事英惠均著先行解任一併送交刑部嚴行審訊按例定擬具奏載遷等志元均有失察之咎均著該衙  
門照例議處○辛巳諭軍機大臣等嗣後辦理交涉事件總須格外慎重每遇更換各國出使大臣未經  
奉旨之先該大臣不得將保薦之人先行漏言懷違勿忽○是月日本國使臣大島圭介回國參贊攜口  
直右衛門署理